



Wantok

K1 tasol

Namba 2110 Februeri 19 - 25, 2015 28 pes

Niuspepa Bilong Yumi Ol PNG Stret!

Wantok Niuspepa i salim tok sori long Opis bilong Spika long raitim nem bilong Honorabel Spika bilong Palamen bilong Papua Niugini, na Memba bilong Finschhafen, Theodore Zurenuoc MP krangi insait long las wik long fran pes bilong Wantok Niuspepa. Mipela i asua long dispela.

No gat Skul Projek Fi i givim hevi

I go moa long pes 2...

Esther Bralyn Wani na Tapua Ekari i raitim

PLANTI skul insait long kantri i no inap statim skul gut bikos gavman i putim tambu long kisim projek fi.

Ol i save strong long projek fi long stretim ol samting bilong skul bipo long skul i stat, tasol nau planti bilong

ol bai i no inap kamapim ol dispela wok bilong skul.

Gerehu Sekenderi skul long NCD em i wanpela bilong ol skul i bungim dispela hevi.

Prinsipal bilong skul, Martin L. Kenehe i tok planti ol projek na karikulam bilong skul bai i pas long wanem gavman i stopim projek fi.

Mista Kenehe i tok ol i bin stop long kisim projek fi long Janueri 26 long dispela yia bihain long tok save i kamap olsem ol skul bai i no inap sasim projek fi.

Mista Kenehe i tok edukesen sistem i tok bai gat 35 sumatin long wanpela klas long lowa sekenderi na 45 sumatin long apa sekenderi tasol nau

ol i abrusim mak bilong edukesen sistem taim gavman i mekim Tuisen Fi Fri (TFF) polisi.

Em i soim long ripot olsem long 2014 mak bilong total namba bilong ol sumatin em 1315 tasol nau ol i abrusim wantaim 707 moa sumatin i mekim total namba i go antap long 2050 sumatin.

INSAIT



Daniel Mona - wanpela gutpela lida bilong ol Goilala

P2

Raskol bagarapim na kilim dai mama long Bulolo - P8

Katolik Profesenel Sosaiti egensim det penelti - P3



Painim ples long slip...

SORI LONG OL: Ol dispela tarangu mama wantaim ol pikinini bilong ol nau i no gat wanpela haus bilong slip na stap long hait long san, win na ren bikos ol polis i helpim papa bilong graun long hap ol i save stap long en na rausim ol long las wik. Ol i stap hait anit long ol fran-sipani flawa diwai na ol mango arere long rot, klostu long Watafran Foodworld Supamaket long Konedobu taim Wantok Nius i bungim ol.

Poto: Esther Bralyn Wani

Air Niugini and Bmobile-Vodafone Deal

When you buy an airline ticket with Air Niugini you can buy an Avvio mobile phone with bundle extras!

bmobile | vodafone
Power to you

For more information contact us now
Customer Care 76003555

For Bookings call Air Niugini
Toll Free 180 3444

- Avvio Smartphone K125
- + Unlimited mins free calls within our network
- + 30 min free calls to any PNG network
- + 30 SMS to any PNG network
- + 30 MB data



Daniel Mona – wanpela gutpela lida bilong ol Goilala

Anna Solomon i raitim

Ol pipel bilong Goilala i wari na sori i stap bihain long ol i harim olsem memba bilong ol Daniel Mona i dai long haus sik long Manila, Filipins. Mista Mona i bin sik na i go long ol St Luke haus sik long Manila, Filipins we em i dai long Februeri 5.

Opis bilong Spika i tok save long indai bilong Mista Mona na bai ol i tok save long wanem taim bodi bilong em bai kam bek long PNG na program bilong planim em.

Long taim mi harim nius bilong indai bilong Daniel, mi tingting bek i go long taim em i wanpela yut lida bilong Katolik Asdaisis bilong Mosbi. Long dispela taim em i wok wantaim ol Katolik sista na i save promotim wok bilong ol yut. *Wantok Niuspepa* na *Times* i bin gat program bilong givim skul long ol lain husat i laik salim stori i kam long niuspepa. Orait mipela i kisim Daniel long wanpela bilong ol dispela wok-sop na givim save long em long raitim

ol stori na kisim poto bilong putim long niuspepa.

Em nau, Daniel i yusim dispela save bilong em long raitim ol stori na kisim poto long niuspepa. Bihain em i kam wok liklik taim long *Times* na em i lusim i go.

Em i wanpela gutpela wokman husat i gat network bilong em namel long ol yut na pipel long komyuniti. Bihain long em i lusim mipela em i bin go wok long Nesenel Disasta Desk bilong Sentral Provinsal Gavman. Em i save helpim mipela na ol arapela nius ogensaisen long nius sapos wanpela birua i kamap long Sentral provins.

Wok bilong Daniel long komyuniti na pasin bilong em olsem lida i helpim em long winim sit bilong Goilala ilektoret long 2012 nesenel ileksen. Em i bihainim lek mak bilong papa bilong em Loius Mona husat i bin wanpela memba bilong Goilala bipo.

Daniel i luksave long pawa bilong media na olsem wanem ol niuspepa o redio o televisen i ken helpim em.

Na em i yusim media long soim ilektoret bilong em na ol plen bilong em long helpim ol pipel bilong Goilala. Bikpela laik bilong em tru em long soim PNG olsem ol Goilala i no ol raskol na rabis lain. Em i traim helpim ol long baim skul fi bilong ol studen long ol praimer skul i go inap long yunivesiti.

Long taim em i memba bilong Goilala, em i save kamap oltaim long televien nius na ol pipel bilong PNG i save long wanem samting em i mekim long helpim ol pipel bilong em. Las taim mi bin lukim Daniel em long funerel sevis bilong Jerry Ginua long Septemba las yia we em i tokaut olsem em yet i baim wanpela TV kamera olsem na ol niuslain i save kisim nius bilong em na putim long TV.

Ol pipel bilong Goilala i sot nau long wanpela gutpela lida bilong ol. Yumi pre bai God papa i marimari long sol bilong em na givim em malolo bilong oltaim.



Pipel i mas dai aninit long PNG Death Penalty lo ... Sapos ol i kilim nating

I kam long ABC

GAVMAN bilong Papua New Guinea na ol pipel bilong kantri i tok ol inap pinis long ol lain i save kilim nating ol narapla na nau ol i mas dai aninit long det penelti lo.

PNG Det Penelti lo i tok long ol i mas kilim dai ol husat i gilti long kilim dai nating narapela .

Seketeri bilong Dipatmen bilong Jastis na

Ateni Jenerel, Dokta Lawrence Kalinoe i mekim dispela toktok bihainim ol strongpela tok-tok bilong ol PNG Sios Lidas Kaunsel egensim dispela lo.

Long stat bilong dispela yia, gavman i bin tokaut olsem Nesenel Eksekutiv Kaunsel (NEC) i bin oraitim pinis tripela rot bilong kilim ol pipel husat i stap nau long "Death Row" na husat i wetim dai

bilong ol.

Dokta Kalinoe i tok ol dispela kalabusman i bin kilim ol narapela, sampela i bin yusim ol gun long repim ol meri, na sampela i bin go insait long ol bot long solwara na kilim ol pasinjia.

Dokta Kalinoe i tok tu olsem ol i askim Indonesia long helpim ol long ol rot bilong yusim ol gun na sutim dai ol dispela kalabusman.

No gat Skul Projek Fi i givim hevi

I kam long pes 1...

I gat 52 tisa long skulim ol dispela 2050 sumatin.

Long dispela yia, mak bilong ol sumatin long skul em 1600 tasol ol i abrusim wantaim 700 sumatin moa na i mekim 2300 sumatin. Long dispel namba ol i gat 64 tisa tasol.

Mista Kenehe i mekim dispela tok-tok taim *Wantok Niuspepa* i harim tok win olsem Gerehu Sekenderi i kisim fi long ol sumatin. Tasol em i tok klia olsem ol i kisim fi long ol sumatin i stap long narapela skul na trenfe i go long hap long wanem TFF i karamapim ol long olpela skul bilong ol.

Em i tok moa olsem ol i kisim K1 000 long ol Gret 9 na 10 na K1 200 long ol Gret 11 na 12.

Tasol sampela sumatin i tok ol i baim K1, 200 na narapela K500 gen long painim spes tasol Mista Kenehe i tok em i no save long dispela.

Mista Kenehe i tok klia olsem em bai painimaut long ol woklain bilong em. Em i tok save long ol papamama olsem em i no inap kisim moa mani long K1, 200 na K1, 000 mak long wanem em i no stret.

Mista Kenehe i tok dispela polisi bilong stopim projek fi bai givimhevi long skul bikos skul i save kisim bikpela helpim long en.

Em i tok nau bai stopim sampela skul program long yusim dispela TFF mani long wokim haus bilong ol tisa na ol narapela mentenens wok.

OCCD i sapatim Transpot Sekta Polisi

Opis bilong Klaimet Senis na Dvelopmen (OCCD) i sapatim nupela transpot plen we Dipatmen ov Transpot i mekim na Minista i go pas long strongim na mekim gut pablik transpot sistem. Dispela em long mekim isi na kisim bikpela benefit long pablik na pravit sekta.

OCCD i stap insait long nupela transpot polisi riviwe we Dipatmen ov Transpot i bai draftim dispela yia.

Dispela riviwe em i go wantaim Nesenel klaimet senis polisi ol i kolim Nesenel Klaimet Kompatibel Dvelopmen Menesmen Polisi we O'Neill Dion gavman i bin introdusim las yia. Ol i laikim trenspot sekta polisi long strongim Grin Ikonmik Grot i

go long sastenebel ikonimi.

Dispela riviwe bai lukluk long nid bilong gutpela plening na sapatim bikpela model nesenel na lokal trenspot sistem bai gat liklik taim na kos na isi long raun.

Dispela bai helpim long daunim grinhaus ges we bai bungim wok bilong Yunitet Nesenens Fremwok Konvensen long Klaimet Senis na driman bilong PNG long 2050 long kamap kabon nutrel.

Long stretim taim na kos bai min sotpela rot bilong kar, we bai gat ol lain long wokabout na raun long baisikel. Bai gat ol narapela we i kisim hap bilong yusim fiul, na stretim transpot network, daunim planti kar i pulap na wok bung long daunim polusen long Pot Mosbi.

Dispela bai mekim isi long pablik transpot sistem long wanem ol populesen long siti i go antap na planti wok lain i save slip long Kwikila na Sogeri. Gutpela transpot sistem bai helpim long ol wokman na meri bai raun na gutpela wok.

Nesenel klaimet senis polisi i laikim wok bung wantaim Klaimet Senis Safes Transpotesen program insait long transpot polisi long lukluk long mani bilong pablik transit na non-motoris olsem ol trem, tren na ol kar i gat waia bai wok long taim.

Dispela bai helpim pablik transpot long katim taim na kos na tu em bai helpim long daunim kabon emisen long transpot sekta.

Strongim wok bilong lo na jastis long Milen Be

OL pipel bilong Milen Be provins bai i ken kisim gutpela sevis bilong lo bihain long provinsal gavman i givim tupela nupela haus i go long Opis bilong Pablik Prosekiuta na Opis bilong Pablik Solisita.

Gavman bilong Australia na Milen Be provinsal gavman i bin bung wantaim na sanapim dispela tupela haus bilong ol opisa bilong dispela tupela lo opis.

Las yia ol i bin opim nupela kot haus long Alotau na stretim gen Opis bilong Pablik

Prosekiuta aninit long PNG-Australia Lo na Jastis Patnasip (PALIP).

Olgeta wantaim nau bai i helpim wok bilong lo insait long Milen Be provins. I no bin gat haus bilong ol wokman bipo olsem na ol opisa bilong lo i no inap stap fultaim na wok long provins. Ol i save flai i go wok sotpela taim tasol na ol i lusim gen.

Deputi Pablik Prosekiuta, Timothy Ai i tok nau bai i gat gutpela sevis we ol pipel bilong Milen Be i ken kisim

helpim bilong legal sevis.

Gavman bilong Australia wantaim Milen Be provinsal gavman i putim K720,000 long sanapim dispela tupela haus.

Gavman bilong Papua Niugini na Australia i wok bung long strongim wok bilong lo na jastis long kantri.

Gavman bilong Australa i save givim mani na teknikel sapat long Papua Niugini lo na jastis sekta aninit long PNG-Australia Lo na Jastis Patnasip-Trensien Program (PALJP-TP).

Katolik Profesenel Sosaiti egensim det penelti



EGENSIM: Presiden bilong Katolik Profesenel Sosaiti, Loya Paul Harricknen na Embaseda Max Rai long nius konprens.
Poto: Nicky Bernard

Sape Mettail raitim

OUR FATHER WHO ART IN HEAVEN – PAPA BILONG MIPELA HUSAT ISTAP LONG HEVEN' em i prea we ol politisen i save mekim long palamen haus bipo long ol i save go het long statim wok politik bilong ol.

Na sapos ol i save daunim het, pasim ai na mekim dispela beten i go long Papa God, orait ol i mas kisim bel isi tu bilong Papa God na marimari long 12-pela kalabusman husat i stap nau long det ro o husat bai dai long han bilong ol ek-sekyusena (executioner).

Gavman i bin pasim lo i go daun long jastis sistem bilong Papua Niugini we em i tok orait long kilim indai ol man na meri husat i kilim dai ol narapela.

Olsem na lo i wokim disisen bilong em long kilim dai dispela 12-pela man husat i gat asua bilong kilim dai ol narapela lain.

Dai bilong ol i ken kamap long taim ol i givim posin sut marasin, hangamap ol long nek o ol bai sanap fran long pa-riang skwat husat bai sutim ol long gan.

Gavman i pasim lo pinis long mekim dispela pasin long 2013 na 12-pela man i wetim nau taim bilong dai bilong ol.

Tasol dispelail no go daun gut wantaim wampela sosaiti husat i egensim dispela pasin bilong kilim dai 12-pela man.

Katolik Profesenel Sosaiti bilong PNG (CPS) i saptotim tingting bilong ol Katolik Bisop Konprens (CBC) na ol Sios Lida Kausil bilong PNG sios Patnasip Program we ol i no wanbel long dispela ekt bilong det penelti.

Long wampela nius konprens long las wik Trinde ol i bin holim long St Joseph's Konprens Hol long Boroko long Pot Mosbi, Presiden bilong asosiesen, Paul Harricken, i tok long lukluk bilong sosaiti, stet o gavman yet i tok orait long kamapim det penelti.

Em i tok sapos dispela i kamap, em yet bai kamapim pasin vailens na bringim hevi i go long ol pipel bilong em yet, na dispela em i no fea.

Em i tok piksa long ol dai we ibin kamap long Lae na long Pot Mosbi em as tru long bringim vailens na hevi i go long dispela ol lain em gavman na polis bai wok wantaim long sutim na kilim idai ol man na meri long laik.

"Dispela em i klia olsem stet vailens. Mipela i lukim olsem em i no stret, long wanem, polis i sapos long sevim laip na lukautim ol samting, na i no long kilim ol man nating na bagarapim tu ol samting.

"Long dispela as, mipela i kisim maus bilong olgeta Kristen long PNG na i laik tokaut olsem mipela i luksave olsem, tru dispela ol man i kamapim pinis pasin bilong kilim dai ol narapela, tasol tingim, em laip bilong ol man olsem na pasin bilong marimari i mas stap.

"Na long kilim dai dispela lain i no ansa bilong lo na oda long PNG, nogat.

"Em i olsem strongpela vailens na hevi em stet yet bai kamapim long ol pipel na dispela i no bihainim stret pasin bilong humen rait we i stap long UN Yunivesel Deklaresen bilong Hiumen Raits Atikel 3 na Atikel 4.

Dispela pasin bai putim tu ol lo enfosmen ejensis i kamap olsem ol lain bilong kamapim vailens, bringim hevi na dai tu wantaim", Harricken i tok.

Em i tok strong tu olsem polis i wok long yusim krangi ol gan, olsem na ating em i gutpela moa sapos polis i no ken karim gan raun na sutim ol man nating long laik.

Harricken i tok sapos gavman na lo bilong PNG i wanbel na pasim det penelti lo, em i mas tingting gut pastaim long husat tru bai kamapim eksekusyen o kilim dai dispela 12-pela man.

"Long wanem as na bai mipela i singautim ol man bilong kilim dai ol kalabus lain i kam long Indonesia o Tailen long kam na kilim dai ol lain brata bilong mipela", Harricken i tok.

Narapela memba bilong sosaiti, Eric Kyosunan i tok, tru olsem dispela ol man i kamapim pinis birua na dai bilong ol narapela man na meri.

Tasol long putim ol i go long det ro em i no stret, long wanem, dispela em ol man na i no ol enimol.

"Pasin marimari em i stap olsem na sapos ol i mekim ol dispela pasin bilong kilim dai narapela, orait yumi mas putim ol i go long kalabus, pasim ol fail bilong ol na ol i ken istap insait long banis kalabus i go inap ol i lapun na dai. Long kisim laip bilong narapela man long pasin bilong hangamap,



Project fees, New uniforms, Text books? Start the year on a good note with all your back to school needs financed through a

BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval



320 1212 / 7030 1212 - 24/7
servicebsp@bsp.com.pg
www.bsp.com.pg



Official Sponsor of the 2015 Pacific Games

Kompensesen kamap bikpela bisnis long Simbu


OL PAPAGRAUN grup long Simbu i laikim Dipatmen bilong Woks i baim ol K67 milien aninit long Hailans Haiwe Ekstensen program. Tasol memba bilong Chuave, Vera Mori i tok dispela em ol giaman kleim bilong ol papagraun.

Mista Mori i askim Minista bilong Woks Francis Awesa long tok klia long wanem rot ol papagraun i putim kleim long dipatmen. Em i tok wanpela stadi em i go pas i long en i painimaut pinis husat i papagraun na husat i no papagraun arere long Hailans Haiwe.

Mista Mori i no wanbel long harim olsem ol papagraun grup bilong Simbu i laikim K67m long Woks Dipatmen.

Em i askim Mista Awesa long tok klia sapos tru ol papagraun putim kleim na sapos yes em wanem kain kleim.

Mista Awesa i tok tru olsem ol papagraun



grup long Simbu i putim K67 milien kleim. Mista Awesa i tok em ol papagraun husat i

no bin kisim kompensesen long taim gavman i baim ol papagraun long Simbu.

Mista Mori i kirap na tok em bin go pas na yusim setelaik teknoloji na gat trupela infomesen bilong husat i papagraun na husat i giaman long stilim mani bilong gavman na putim kleim.

Mista Mori i tok planti bilong ol kleim bilong papagraun em bin giaman na em i rausim pinis na ol tru papagraun husat stap arere long rot bin kisim kompensesen mani pinis.

Mista Awesa i tok moa long K50 milien i lus long pasin korapsen long nem bilong Hailans Haiwe program na em long Simbu seksen tasol. Em i tok planti mani lus long las tupela yia na go antap so dipatmen i laikim painimaut asua i stap long wanem hap.

Memba bilong Sinesine Yongomugl, Kerenga Kua i tok planti ol kompensesen

kleim em giaman kleim na em tu i askim gavman long yusim ol lo bilong kantri long pinisim pasin bilong baim kompensesen long ol papagraun.

Mista Mori i tok kompensesen klem i no ken kamap olsem wanpela industri long Simbu provins na em i askim Woks Dipatmen long no ken kisim kleim long ol papagraun.

Mista Awesa i tok ol papagraun long Simbu i bung na kamapim papagraun asosiesen na putim kleim na tu i kotim Woks Dipatmen bikos ol i tok ol i trupela papagraun tasol gavman i no baim ol.

Mista Awesa i tok kompensesen eges gavman em wanpela bikpela hevi i wok long pasim developmen na gavman bai putim tambu long baim kompensesen.

Gavman rausim ol Open Campus

DIPATMEN bilong Haia Edukesen i rausim program bilong open kempas (Open Campus) we planti ol sumatin husat inap long go long ol yunivesiti tasol spes i sot, i save enrol long open kempas.

Minista bilong Haia Edukesen, Malakai Tabar i tok gavman i rausim open kempas bihain long em i bung wantaim Dipatmen Seketeri Dokta Davaid Kananamur na olgeta Vais Sensela bilong olgeta yunivesiti.

Em i tok ol i lukim olsem dispela tingting bilong open kempas i no gutpela. Tasol em i tok gavman bai kamapim wanpela narapela plen long ol sumatin i ken stadi gut aninit long dispela tingting bilong open kempas.

MistaTabar i mekim dispela toktok long bekim askim bilong memba bilong ijivitari David Arore. Mista Arore i bin holim wok bilong Minista bilong Haia Edukesen bipo. Em i askim MistaTabar long tok klia long wanem as gavman i rausim ol open kempas.

Mista Arore i tok gavman long wan wan yia i save putim K5 milien na long 2014 baset ol i putim K5 milien long dispela program. Em i tok dispela program i save enrolim 18,000 sumatin long stadi aninit long

open kempas, wankain program olsem ol yunivesiti i lainim.

Long dispela wik, Seketeri bilong Haia Edukesen, Dokta David Kavanamur i tokaut olsem 5628 sumatin tasol i kisim ples long ol teseri institusen. Moa long 21,000 sekenderi sumatin i pinisim gret 12 long 2014 tasol i no gat inap spes long ol bai go het.

Dokta Kavanamur i tok 15,372 sumatin bai i no inap go long ol yunivesiti, koles na ol teknikal koles na bisnis koles.

Mista Arore i tok sapos i gat open kempas program stap bai olgeta 15,000 i ken gat sans long stadi.

Minista Tabar i tok dipatmen i tok yet long kamapim gutpela polisi na program long kisim ples bilong open kempas. Em i tok i gat plen olsem ol sumatin bai stap long haus bilong ol yet bai ken stadi long ol kos long wanem yunivesiti ol i laikim.

Aninit long open kempas program bipo, ol sumatin go long ol skul na kisim kos na sampela taim em i dia tumas long ol.

Em i tok bihain long miting wantaim ol vais sansela bilong olgeta yunivesiti, dipatmen i rausim open kempas.

PM givim notis bilong SWF

PRAIM MINISTA Peter O'Neill givim notis long palamen i tok orait long bil bilong Soveren Welt Fan long menesim ol winmani bilong oil, ges na arapela mineral.

MISTA O'Neill i givim notis long dispela wik na draf bil i stap nau wantaim Pemenen Palamen Komiti bilong Bil na Lejislesen long glasim pastaim bipo long palamen bai votim na kamap lo.

SWF bil em palamen i oraitim pinis tasol O'Neill gavman i rausim bihain long ol i tok sampela asua i stap long bil.

Mista O'Neill i tok gavman bilong em i wok long pait strong long daunim pasin korapsen long kantri na dispela em wanpela rot bilong lukautim gut pablik mani bilong bihain taim.

SWF em gat gutpela hap, wanpela em seving bilong putim winmani long kantri i ken yusim long bihain taim. Na narapela em stebelaisesen fan. Gavman i ken

yusim long ol projek sapos baset bilong kantri i sot na gavman i nidim mani.

Bikpela tok bilas i kamap taim kantri i salim LNG ges i go aut long wol maket tasol i no bin gat lo bilong SWF long lukautim gut winmani.

ExxonMobil i tokaut olsem kantri i salim 65 sipmen bilong ges i go aut long wol maket na dispela mani em ExxonMobil i lukautim long ausait kantri bikos PNG gavman i no gat fan aninit long lo long lukautim winmani bilong oil, ges, na ol mineral.

Atoni Jenerel bipo, Kerenga Kua i tok em i no wanbel long gavman i rausim SWF bil na laik stretim gen. Em i tok ol saveman i bin putim tingting wantaim na kamapim dispela SWF lo pinis na bilong wanem as tru na O'Neill gavman i tok i gat sampela asua i stap.

Wanpela bikpela samting ol saveman, na pablik i wari em aninit long nupela SWF bil, ol politisen i no ken stap insait

long wanpela hap kona bilong SWF.

Mista Kua i tok SWF menesmen i mas kamap wankain olsem Nasfan na Nambawan Supa Fan we ol politisen i no stap insait long mak bilong bot na menesmen bilong fan.

Planti singaut long gavman i mas putim ples klia long ol draf kopi bilong bil long ol pablik i ken lusave tasol dispela i no bin kamap yet.

Oposisen i tok SWF bil na na kamap ples klia yet na i singaut long gavman long stretim gut long ol politisen i no ken makim bot na menesmen.

Oposisen i tok pablik mani i save paul taim man gavman i makim i stap long posisen bilong mekim disisen bilong mani.

Oposisen i tok gavman i makim ol hetman bilong ol bikpela bisnis bilong pipel olsem Ol Stet On Entaprais na lukim bisnis i no ran gut na gavman i lakim salim.

PNC na URP pati sainim agrimen long sanap wantaim

PIPELS Nesanel Kongress pati (PNC) bilong Praim Minista O'Neill na Yunaited (URP) pati i sainim agrimen long sanap strong long politiks long gutpela taim na taim nogut na go long ileksen long 2017 olsem kolisen pati.

PNG Pati lida, Peter O'Neill na URP pati lida na Trensport Minista, William Duma i sainim agrimen long soim olsem kolisen gavman bilong O'Neill i gat strong.

Mista Duma i tok politikal stabiliti em i gutpela bilong kantri na i tok O'Neill Dion gavman i soim stabiliti pinis na dispela agrimen i soim olsem URP pati bai wok klostu wantaim PNC Pati long kolisen gavman.

URP pati i gat 8-pela memba na i gat tupela ministri long kolisen gavman. PNC Pati i gat 56 memba.

Mista Duma i tok URP pati em i faundersen memba bilong gavman bilong O'Neill long 2011 na long 2012 bihain long ileksen na i stap yet long givim moa sapat.

Mista O'Neill i tok stabiliti em i gutpela bilong kantri na wantaim stabiliti long gavman bilong em kantri i lukim ikonmik i gro na planti investa i kamap long kantri long

mekim bisnis na patna long ol developmen bilong kantri.

Dispela agrimen i kamap bihain tasol long Oposisen lida, Don Polye i pretim gavman olsem em i mekim muv long rausim sia bilong Mista O'Neill na kamapim nupela gavman.

Mista Polye i tok em i no gutpela long tupela pati tasol sainim agrimen bikos i gat planti politikal pati long kolisen gavman. Em i tok Praim Minista i no gat rispek long ol araoela politikal pati.

PNC pati winim 26 memba long 2102 ileksen na nau i gat 56 memba. T.H.E pati bilong Polye bin winim 14 memba long 2012 ileksen na em bin namba tu bikpela pati long O'Neill gavman taim ol i kamapim gavman wantaim.

Mista Polye i tok em i wok yet na i tok kolisen gavman i no gat strong na taim em i rausim Mista O'Neill long sia bilong Praim Minista, PNC pati wantaim Mista O'Neill bai i gat 31 memba tasol.

Polye i tok em i wok hat long rausim gavman na gat 21 memba pinis long givim notis long spika long kamapim vot i no gat bilip long Mista O'Neill.



Somare, Polye, O'Neill long gutpela taim. Polye dispela taim bin minista bilong Tresari na lapun Somare bin stap baksait long tupela yangpela. Tasol nau sampela senis long gavman i kamap, ol i no moa stap wantaim.

Ol mama i no gat haus moa long Watafran

Frieda Sila Kana i raitim

SAMPELA mama wantaim ol pikinini bilong ol na sampela man husat i save stap long wanpela hap bilong Watafran long Konedobu nau i no gat haus na ples long stap bikos ol lain i baim dispela hap graun i rausim ol long las wik.

Dispela ol mama i save stap longpela taim long dispela hap arere long wanpela basis tasol nau ol kampani i pulapim solwara na kamapim graun na sampela bikpela bisnis na haus i kirap long ol.

Bikpela hap bilong dispela nupela graun we bipo solwara i bin stap long en, em nau bikpela Watafran Foodworld Supamaket i sanap long en.

Sampela taim i go pinis, ol papa bilong dispela hap graun namel tasol long Foodworld long Watafran na Puma Sevis Stesin, i tokim ol dispela mama na ol lain bilong ol long klia long dispela hap. Tasol ol i no bin kirap i go hariap olsem na tupela wik i go pinis em ol papa graun i kisim polis na ol i rausim ol dispela mama na pikinini i go ausait long banis kapa na ol i putim kanvas ausait tasol long geit na ol i stap inap long tupela wik.

Las wik taim *Wantok* Nius ripot i go long lukim dispela hap, mipela i lukim tasol paia i lait i stap we ol

polis i kam na kukim sel o kanvas na rausim ol mama na pikinini i go na ol i holim pas 4-pela maus man bilong ol na kisim i go long Boroko Polis sel.

Taim Wantok Nius i go long lukim ol, em ol mama na pikinini i stap wantaim ol liklik kago bilong ol aninit long ol mango na frenjipani diwai hapsait long rot i go long sait bilong Toguba Maunten long Konedobu yet.

Ol mama i kra i na i tok, ol pikinini bilong ol i lusim skul inap long tupela wik nau bikos ol i stap long hevi nau.

“Taim bilong skul stret ol dispela lain i save kam mekim olsem na ol i save bagarapim skul bilong ol pikinini bilong mipela. Em i 4-pela taim nau mipela i kisim dispela kain hevi we ol i rausim mipela long haus bilong mipela,” Misis Lili George i tok.

Wantok Niuspepa i toktok wantaim wanpela man ausait long dispela banis na i kisim save olsem ol dispela mama wantaim ol sampela man husat i bin save stap long dispela hap, i bin kot 3-pela taim pinis na ol i no winim kot long stap yet long dispela graun.

Misis Lili George i tok, taim ol polis i kisim ol mausman bilong ol i go long polis sel, em i go lukim loiya bilong ol tasol em tokim em long ol meri i mas bungim mani na



Sampela mama na pikinini i stap aninit long ol mango diwai na ol frenjipani plawa, long sait bilong Toguba maunten, Konedobu. Foto: Esther Bralyn Wani

go beilim ol dispela man. Ol i no gat inap mani olsem na ol i sindaun tasol na wet long sampela helpim bai kamap.

Ol mama i bin tok tenkyu long Memba bilong Pot Mosbi Saut, Justin Tkatchenko husat i bin go lukim ol las wik taim ol i bin rausim ol kam ausait long rot na em i givim

ol sampela mani. Ol i tok tenkyu tu long ol narapela lain husat i bin soim gutpela bel na givim ol sampela kaikai samting taim ol i sindaun long sait bilong rot long las wik.

Tasol bikpela samting ol i laikim memba bilong ol long Pot Mosbi Not Wes na Gavana Powes

Parkop i painim wanpela hap long ol i ken stap wantaim ol pikinini bilong ol. Ol i stap nau long warim bikos ol pikinini bilong ol i ranawe na stap nabaut wantaim ol wantok long siti.

Moa long dispela stori bai kamap long wik bihain insait long *“Wantok Today”*.

Indipenden Stet bilong Papua Niugini

MINISTA BILONG JASTIS NA ATONI JENEREL

NIUS TOKSAVE



Dia Mista Kavvo,

RE: STAP BILONG YU NAU OLSEM WANPELA MAN KALABUS MAN NA I STAP LONG BEIL

Mi lukim olsem bihain long kot i painim olsem yu asua na Nesenel Kot i givim yu taim bilong kalabus long 9 Disemba 2014, na gen yu winim beil aplikesen bilong (wetim yet apil bilong yu), yu bin wokim planti toktok long midia olsem yu stap Gavana yet bilong Galp Provisins. I gat ripot tu i stap olsem yu bin traim long holim wanpela PEC miting insait long dispela taim.

Mi ritim ol tingting bilong kain kain ol loman na ol loman bilong mi yet na tu ol loman bilong yu na mi kisim tok stia bilong ol, em long dispela midia stemen we i kamap long 9 Janueri 2015 na narapela pas i go long Kuskus bilong Asembli long 31 Disemba 2014 – we i tok olsem yu bin putim apil, aninit long wok bilong Seksen 103(4) **Mama Lo** – yu inap long **“stap yet olsem wanpela memba bilong Palamen”**. (see 103(3)). Plis yu lukim long Seksen 103(4) **Mama Lo** i holim mak bilong yu olsem wanpela Memba bilong Palamen, tasol em i klia olsem yu no inap stap olsem Gavana.

Tasol, mi sori tru olsem olgeta tok stia na tingting bilong ol loman bilong yu i no helpim yu long abrusim taim bilong kalabus we kot i bin givim long yu, na tu olsem yu stap yet olsem wanpela kalabus man bilong stet tasol yu stap long beil, na dispela em i senisim stap bilong yu olsem Gavana.

Nau yu stap olsem kot i lukim yu asua na yu wanpela kalabus man aninit long stet tasol yu stap ausait long beil, mi ting olsem Seksen 27(1)(b)(c) na (d) na (5) **Mama Lo** bai kam insait. Long helpim yu long no ken tingting planti, mi nau kolim gen ol dispela lo: “27 Wok bilong Opis

Wanpela man husat bai i stap long dispela Divisen em i gat wok long mekim kain pasin, long pablik o opisal laip na long praivet laip bilong en, na long stap bilong en wantaim ol narapela lain, na i no,

Long daunim nem bilong opis bilong en o posisen bilong em; o Long bagarapim gutpela nem bilong em long pablik o opisal nem, long i gat toktok; o Long bringim bagarap o daunim pasin bilong rispek na gutpela tingting bilong gavman bilong Papua Niugini.”

Sabseksen (5) bilong Seksen 27 bilong Konstitusen, i tok klia tru olsem: “Taim wanpela man we dispela Divisen i tok long en –

I kisim taim long kalabus long wanpela rong em i mekim long opis bilong em o long wok posisen bilong en o long taim em i mekim wok bilong em; o Em i gat asua olsem em i no mekim gut wok bilong em long opis.”

Olgeta lain i save olsem kot bin makim taim long yu go kalabus long ol rong yu mekim insait long wok bilong yu olsem Gavana na long Opis bilong Gavana. Bihain dispela tok-tok, mi lukim olsem nau em yu gat asua long yu mekim rong insait long opis.

Mak bilong dispela em olsem nau em yu **“no gat pawa aninit long lo”** – na dispela lo em long Seksen 27(1) na (5) **Mama Lo** olsem mi tok antap pinis – long yu go het na holim wok olsem Gavana. Dispela em i wok bilong Seksen 19(1)(e) bilong **Oganik Lo bilong Provinsal na Lokol Level Gavman** we i tok olsem:

“Lusim Opis bilong Provinsal Gavana” –

Sapos Provinsal Gavana –
Lo i tok no gat long em, o,
Lo i lukim em olsem em i lusim Opis bilong Gavana pinis.”

Long mekim moa klia, mi laik tok gen olsem. Apil bilong yu long Suprim Kot long salensim taim nesanel kot i givim yu long go kalabus na long wok bilong Seksen 103(4) **Mama Lo** i larim yu long stap olsem Memba bilong Palamen tasol. Em i no karamapim yu long go bek long wok bilong yu pastaim olsem Gavana. Bihainim taim kot i givim yu, Seksen 27(1) na (5) **Mama Lo** i wok na long dispela as, lo i tok yu no gat pawa (s.27(1) na (5)) long holim yet wok bilong opis bilong Gavana aninit long Seksen 19 (1)(e) bilong **Oganik Lo bilong Provinsal na Lokol Level Gavman**.

Kuskus bilong Asembli bilong Galp Provinsal Gavman bai bihainim kopi bilong dispela pas, na singaut long wanpela miting bilong Provinsal Asembli bai kamap, bihainim ol lo i toktok long dispela wantaim Asembli Stending Oda na makim nupela Ekting Gavana.

Mi,

HON. ANO PALA, LLB CMG MP
Minista bilong Jastis na Atoni Jeneral



Bringim bek, Senisim Kamapim Nupela Nesenel Palamen

“Save long Palamen” wantaim Hon. Theo Zurenouc, MP.

Bungim Spika bilong yu

Welkam long namba wan lain toktok pepa bilong wik i soim ol wok bilong palamen sistem na ol proses bilong bikpela toktok “Save long Palamen” Spika i bilip strong olsem sapos ol pipel i kisim save long ol toktok bilong palamen em bai givim ol moa pawa long mekim ol disisen, kirapim tingting, strongim trans-parensi, lukautim mani gut na kamapim gutpela pasin bilong wok long palamen. Dispela tingting em i bi-hainim visen bilong Spika long “Bringim bek, Senisim, Kamapim nupela Nesenel Palamen”

Stori bilong famili

Theo i karim nem bilong wanpela gutpela famili bihainim tumbuna lain bilong en long stap insait long sios, edukesen na politik. Papa bilong em, Leit Sir. Zibang Zurenouc MBE, KBE, em i bin namba wan memba bilong Finschhafen Ilektolet bihain long independens (1977-1982). Em i bin wanpela Kopretiv Opisa bilong Gavman, na bihain kamap wanpela Bisnisman na bihain kamap Politisen.

Em i bin stap olsem Deputi Spika bilong Palamen na Minista bilong Hom Afeas long Gavman aninit long Praim Minista Sir Julius Chan long stat bilong ol 1990 yia. Em i bin stap olsem Seketeri bilong Dipatmen bilong Transpot, bihain Seketeri bilong Lens Dipatmen na bihain kamap Menesing Dairekta bilong Fores pastaim long em i kamap memba bilong Finschhafen long 2002 i go long 2007.

Theodore Zurenouc i kisim ples bilong kasen brata bilong en Guao Zurenouc long Ogas 2007 na nau em i stap memba na Spika bilong Nesenel Palamen.

Stori bilong Spika bilong namba 9 Palamen

Theodore Zurenouc i bin statim skul bilong em long Gagidu Prameru Skul na bihain em i go long Dregerhafen Haikul long 1977 i go long 1980 long Finschhafen we em i bin stap kamap long en, pastaim long em i winim wanpela ples long Sogeri Nesenel Haikul insait long Sentral Provins bilong Papua Niugini long 1981 na 1982 long wokim nesenel haikul edukesen bilong em.

Bihain stret long em i bin pinsim skul bilong akaunting na komes long Yunivesiti bilong Teknologi long Lae em i kisim wok wantaim Kostal Siping Kampani na insait long 3-pela yia tasol em i kamap Kampani Menesa pastaim long em i risain na i go bek long Finschhafen long statim wanpela praivet bisnis long 1991.

Theodore Zurenouc i statim wok long praivet sekta wantaim Siping Industri pastaim long em i go kamap praivet bisnis man na Treeding Bisnis pastaim long em i go insait long politik.

Em i go insait long mekim bisnis bilong famili bilong em i go bikpela long Finschhafen na long dispela taim i kam em i mekim famili bisnis tasol i go bikpela taim em i senisim tingting bilong bisnis bilong Kamapim Samting na treid stua na i go insait long ril estet o bisnis bilong salim na putim ol haus long rent na nau em i gat ol stok insait long ol narapela bikpela faktori kampani insait long PNG.

Em i stap memba bilong Bod ov Dairekta bilong Lae Bisket Grup na ol sait bisnis bilong em.

Em i bin stap memba bilong Bod ov Gavanas bilong Finschhafen Teknikal na Vokesenel Skul na em i bin stap memba bilong Kaunsil bilong ol Senia Flieri Luteran Semineri inap long taim em i go insait long Politik long 2007.

Em i gat bikpela laik long strongim pasin bilong stap olsem Kristen na em i bin kirapim Finschhafen Evangelisim Ministri (wanpela infomol ministri) we em i save wok wantaim ol LUTERAN Sios long wok bilong bringim bek laik insait long spirit long ol pipel bilong ilektolet bilong em.

Em i bin go insait long politik na i win long 2007 na em i kam bek gen long 2012 nesenel ileksen long namba tu taim olsem Memba bilong Finschhafen Open. Long Ogas 3, 2012 ol i bin makim em long kamap Spika bilong namba 9 Palamen. Em i bin go insait long Palamen olsem wanpela independen kenid na bihain em i go wantaim Pipels Progres Pati. Em i bin stap liklik taim tasol olsem memba bilong Palamentri Riferal Komiti bilong Fainens pastaim long em i kisim wok Minista bilong Edukesen long 5 Ogas 2011 wantaim O'Neill/Namah kabinet. Long apinun bilong de ol i makim em olsem Edukesen Minista em i bin autim plen bilong em long givim Fri edukesen long kantri. Dispela i bin kam wantaim planti tok paik bikos em i no bin kisim tok orait bilong Kabinet pastaim long toktok i kamap. Tasol dispela Tuisen Fi Fri Edukesen Polisi bilong em nau i kamap olsem wanpela ki Nesenel Gavman polisi bilong gavman tude. Long 2012 jeneral ileksen ol i bin ilektim em olsem kandidat bilong Pipels Progres Pati.

Wankain olsem ol yangpela manmeri em i bin gat bikpela tingting long go insait long lejisletiv asembli long givim han long senisim PNG long kamap wanpela kantri we bai i kamap fri na kamap strong long ikonomi na sosol laip. Tasol em i no bin save olsem wanpela de ol bai ilektim em long kamap hetman bilong lejisletiv han bilong gavman long wanpela kain taim we em i bin go daun tru insait long olgeta yia long taim kantri i kisim independens i kam. Tasol em i bin wanbel tasol na kisim dispela salens olsem wanpela singaut bilong God na hariap tru em i kirapim wok bilong kamapim driman bilong em ples klia long “Bringim bek, Senisim, Kamapim nupela” Palamen long bringim bek gutpela nem bilong Palamen we i bin bagarap.

Em i kisim stia long tingting olsem olgeta bikpela posisen em God yet i save makim, na ol dispela wok i save kamap long laik bilong God long bringim senis o long kamapim senis. Ol wok we God i makim i mas bringim gutpela senis long laik bilong moa pipel long stap gut...na i no ken tru bagarapim sindaun bilong ol, maski hamas mani bai i go insait long en. Theo i soim olsem em i wanpela strongpela man i gat gutpela tingting na i save bihainim stretpela pasin we i kam long strongpela Kristen bilip bilong papa na tumbuna lain bilong em. Ol dispela gutpela pasin i soim kala long taim bilong em olsem Memba bilong Palamen long Oposisen, Minista bilong Stret, Memba bilong Palamen Komiti na Spika.

Oi wok kamap bilong em

Planti samting i bin kamap long taim em i kisim opis. Ol lain husat i go lukluk raun long palamen bai lukim nupela kain lukluk i kamap long wanpela olpela haus. Wok poroman bilong em wantaim TIPNG na EU long “Open Palamen Proje” i karim kaikai. Ol pipel bilong PNG i ken kisim save long ol toktok bilong palamen insait long websait – www.parliament.gov.pg na wok bilong ol MP ol i ken kisim long SMS taim ol i salim teks wantaim fes nem na las nem bilong MP i go long fon namba 70000300. Wok wantaim Queensland Palamen olsem tupela twins i wok long kamapim gutpela samting long palamen. Wanbel toktok wantaim Yunaitet Nesenel Developmen Program i no long taim i go pinis bai strongim moa ol senis i kamap. Planti gutpela senis i kamap pinis long Palamen na tu long ilektolet bilong em long Finschhafen tasol em i gat moa yet long mekim.

Ating nem bilong Theo bai i go insait long stori bilong bihain olsem em i wanpela man bilong wokim bikpela senis long stap olsem hetman bilong Lejisletiv Han bilong Gavman? Taim tasol bai i ken skelim yumi. Tasol long nau em i nidim bikpela sapat bilong yumi long em i ken ranim gut driman bilong em long bringim senis long Palamen na long helpim ilektolet bilong em moa long gutpela pasin.

Insait long narapela toktok bihain, Spika bai toktok long “Wok bilong Palamen aninit long Konstitusen.” Long save moa yu ken go long websait www.parliament.gov.pg o yu ken salim askim bilong yu i go long email: speaker@parliament.gov.pg.

Theodore Z Zurenouc - Finschhafen MP na Spika bilong Nesenel Palamen

Sivel Rejistri kamap wanpela ejensi ...kisim nupela opis

Frieda Sila Kana i raitim

SIVEL Rejistri, wanpela bikpela ejensi bilong gavman we i save stap insait long Dipatmen bilong Yut Meri, Sios na Komyuniti Developmen, nau i kamap wanpela gavman enjensi bilong em yet.

Em i kisim nupela nem olsem Sivel na Aidentiti Rejistri (CI&R) opis. Moa long dispela em i gat nupela opis insait long wanpela tupela haus i gat tupela plua, baksait tasol long opis bilong Implementesen na Rural Developmen Dipatmen long Waigani.

PNG NID-PNG Sivel na Aidentiti Rejistra, Dickson Kirangi long las wik i bin tok long planti yia i go, Sivel Rejistri opis i bin stap olsem was pikinini bilong planti lain.

Tasol nau projek bilong Nesenel Aidentiti i mekim na Sivel Rejistri i kamap wanpela bikpela ejensi yet insait long kantri.

Sivel Rejistri aninit long Dipatmen bilong Komyuniti Developmen, i bin kamapim wanpela Microsoft sistem na Access program long holim ol rekot bi-

long ol lain i rejista, tasol dispela i no bin inap long givim olgeta samting gavman na ol developmen patna na ol sitisen i nidim.

PNG Nesenel Aidentiti Projek i kam wantaim wanpela bikpela mesin bilong rejistaim nem na stori bilong olgeta sitisen long ol bebi nau tasol i kamap i go inap long ol lapun i kam long Huawei Teknologi.

Em i gat wanpela bikpela ‘masta’ mesin long Pot Mosbi na 600 ol mobail kit we ol patrol tim bai karim i go aut long kisim rejista bilong ol pipel.

“Tasol nau mipela i kisim namba wan mesin tru long teknologi wol long putim insait long 22 provinsal het opis. Dispela bai kamap, stat long mun Disemba 2015.

Sauten Hailans, Westen Hailans, Sentral Provins na Nesenel Kapital Distrik nau i gat ol provinsal rejistri senta i kirap pinis,” Mista Kirangi i tok.

PNG CI&R opis nau bai wok klostu wantaim Nesenel Statistik Opis long wokim ol rejista bilong olgeta manmeri na pikinini bilong Papua Niugini.

Ol bon dei setifiket mas go bek long Sivel Rejistri nau

Frieda Sila Kana i raitim

PNG NID-PNG Sivel na Aidentiti Rejistra, Dickson Kirangi i singaut long kisim bek olgeta bon dei setifiket nau.

Bikpela toksave bai kamaut long ol media long olgeta lain husat i gat bon dei setifiket pinis long ol i mas bringim bek bikos em bai no gat pawa nau bihain long nupela ilektronik ID kat i kamap.

Long las wik wanpela toksave pepa i go aut long stopim nupela setifiket na long kisim bek olgeta olpela we i go aut pinis.

Opis bilong Sivel Rejistri bai prinim 8000 Bon De Setifiket na lusim long wan wan provinsal senta. Ol bai redim tu komon sil we bai provinsal rejistra i sainim taim setifiket i redi. Olgeta gavman ejensi bai kisim toksave long husat bai stap olsem provinsal rejistra olsem bai ol sitisen i no ken gat hevi taim ol i lonsim ol pepa bilong ol long kisim sampela gavman dokumen olsem paspot o laisens.

Nau bai ol pipel i ken rejista tasol long wanem hap ol i stap long en na ol bai i go insait long sistem. Bihain long nesenel aidentiti projek i stat ol potokopi bilong ol Bon De setifiket bai i no gat pawa moa long yusim long kisim ol opisal pepa bikos ilektronik ID kat bai kamap pinis.

“We bilong rejista i no kam long ausait moa olsem ol narapela rejista bilong pastaim. Mipela yet i kamapim we bilong rejista bilong Bon De Setifiket na Nesenel Aidentiti Kat. Ol toksave mipela i laikim i gutpela na i bihainim sosaiti bilong PNG stret, na wanem

kain we bilong laip yumi stap,” Mista Kirangi i tok.

Em i tok, olgeta ID kat bai kamap long Pot Mosbi tasol ol wok bilong rejista em bai ol i redim long wan wan senta long ol provins.

Em i tok olsem, i gat tupela provinsal rejistra i stap pinis, na bihain long Disemba em bai gat 22 provinsal rejistra i stap long sainim ol bon de setifiket long givim long ol pipel taim ol i rejista. Bai pipel i no nap wet long tripela wik o 6-pela mun olsem nau i save kamap.

Masta rejistra bai kamapim ol EID bilong olgeta lain husat i kisim 18 kris-mas na moa.

Na em bai gat 27,000 senses yunit long olgeta provins we ol bai kisim ol stori bilong ol pipel na salim i go bek long Masta Rejista mesin long Pot Mosbi.

Masin bilong wokim ol ID kat em i kam long Huwawe kampani. Dispela mesin em i bikpela tru na bai stap long CIR opis long Pot Mosbi. Em i gat save long autim 8,000 EID kat insait long wanpela seken. Ol dispela kat bai kositim bikpela mani tasol ol pipel bai no inap long tromoi wanpela mani long go rejista na kisim dispela kat. Tasol ol i mas lukautim gut dispela kat.

I gat tupela bikpela toktok insait long ol rejista pepa we bai ol opisa i luksave na raitim. Em long ‘Ples we sitisen i kam long’ en o ‘as ples bilong en’, na namba tu em ‘Nau em i stap long wanem hap’. Sapos wanpela lain husat papa na mama i kam long narapela provins o kantri, em bai ol i putim luksave bilong en bihainim nem bilong kantri bilong en tasol.



PIH Saveman Nius

"I kam long Pacific International Hospital Port Moresby"

Ph: 311 3000/ Ph: 323 4400 Textline 7155 8866 Website: www.pih.com.pg

PM inaugurates new PIH!

Exerpts from the Speech
by Dr Amyna Sultan OBE
CEO
Pacific International Hospital

13th February 2015

We celebrate another milestone by completing the new Pacific International Hospital – 'the New PIH' – it is a day I have imagined on many a mornings while driving to work down the Korobosea Hills and watching this elegant but abandoned shell of a hospital sit by idly and sadly, year after year.

There is another important reason for me to salute the Prime Minister today. No, not because he happens to be turning 50 this day, although he is – Happy Birthday, Prime Minister! but because it was he under whose chairmanship this hospital project was originally envisioned, 17 years back in time during his term as a dynamic, young Executive Chairman of Finance Pacific!

The word "partnership" I believe should be the key word of this celebration. For it is this concept of partnership that has brought together so many current and potential partners; all here to share the occasion.

My personal experience in a career spanning 15 years in PNG has been broad and diverse, having experienced both sides, I have come to a deep conviction about the immense value of public-private partnership models, –and their potential to significantly boost delivery of quality health care in PNG. Collaborations at various levels between the public and private sectors can greatly enhance national capacity to produce a better qualified health care workforce for all of PNG.

Many well-wishers of Pacific International Hospital are not aware that it was the first private health facility in Port Moresby to offer 24/7 Emergency Care in 2001. The hospital reached this level of operation from its rather humble beginning as the PNG Diagnostic Centre, set up in 1997 to bring PNG its first CT scan. I am delighted to see Sir Puka Temu here today, who supported the idea and inaugurated the centre back then, in his capacity as the secretary for health.

Over the last 17 years, PIH has continued to serve the community and we have continued to be guided by the needs of our patients. As a private eye surgeon specializing in corneal and cataract

surgery, I have painfully experienced the plight of many near-blind patients who are unable to go overseas, and who require retinal surgery not available in PNG. Now PIH has a retina surgeon. This list includes the first mammography for early detection of breast cancer; first hemodialysis unit for supporting patients with kidney failures; and first no stitch phaco-cataract surgery. All of this now topped by the new PIH, offering the first international standard hospital facility of its kind in Papua New Guinea, and equipped with sophisticated cardiac, neuro and minimal invasive surgery capabilities.

In terms of collaboration, PIH remains interested and committed to partnering with: POMGH and other provincial hospitals; The School of Health Sciences; the national and provincial departments of health; and insurance companies and superfunds. The common goal would be to create innovative schemes and economical packages to make available affordable, quality health-care for every Papua New Guinean, whatever their income levels.

We have shared proposals with the NDOH and we look forward to an initiative by the Minister of Health and NDOH to find solutions for public patients to avail the new services at PIH, including the new cardiac and neurosurgery services until such services become available in the public hospital system.

Similarly, we hope to reach out to NGOs and other donor agencies who may wish to join forces with us in making quality health care important, with the opening of the new PIH, we hope to accelerate our role in knowledge and skill transfer to PNG, by bringing in highly qualified professionals with clinical experience and advanced knowledge of hospital systems and operations; through their offering of key educational programs and on-site training, more of our nationals will be able to transition towards higher expertise roles, growing professionally themselves alongside the growth of the hospital.

We aim to prepare the new PIH to meet stringent international quality standards, and thereby set a benchmark for quality medical care in PNG.

As Martin Luther King, Jr., that great humanitarian, put it: "When I climb the mountain I can see the mountain ahead,and from there I can see there are many more mountains to climb!"



Ali amamas long sekhan wantaim Hai Komisina bilong Australia, Deborah Stokes. Dokta Amyna i sanap long namel.



Praim Minista O'Neill i sekhan wantaim Australia Hai Komisina long PNG, Deborah Stokes. Helt Seketeri Pascoe Kase i lukluk stap.



Praim Minista soim amamas long Sista Sawi husat em i wanpela longpela taim wokmeri bilong PIH long taim haus sik i stap yet long 4-Mail.



Dokta Sudhir na Dokta Sitaing insait long Niuroloji opere-sen tieta senta.



Praim Minista na meri bilong em Linda wantaim Minista bilong Stet Enteprais, Ben Micah i lap long wanpela tok pilai bilong Embeseda bilong Filipins long PNG, insait long rum bilong karim bebi.



Dokta Pius Umo na Sista Rachel Flores wantaim Mamogram bilong sekim susu kensa.

240 nupela polis rikrut

Esther Bralyn Wani i raitim

“YU hap bilong bikpela oge-naisesen na netwok na ol pipel bai lukim yupela i nara-pela kain bikos yunifom bai yupela werim em i stail na spesol,” Deputi Polis Komisina, Awan Sete i tok.

Em i tok olsem long 240 nupela polis rikrut long Bomana Polis Kolis long opening bilong trening long las wik Fraide.

Ol polis sumatin i kam long olgeta hap long kantri long statim trening olsem 6-pela mun.

Mista Sete i tok ol dispela nupela rikrut i bihainim plen bilong gavman long apim

namba bilong ol polis long 5000 i go long 10, 000 long 2017.

Dispela em long redi long 2015 Pasifik Gems, lleksen long 2017 na APEC Miting long 2018.

Em i tok moa olsem long Mas las yia, gavman i bin givim K268 milien long Modenaisesen program na hap mani bilong kisim ol nupela polis sumatin.

Ol polis sumatin i kisim salens long Deputi Komisina.

Em i tok Bomana em i hap we ol i no inap go bek taim ol i go insait bikos ol bai senis long kamap gutpela tasol disisen ol i wokim bihain em bilong ol yet.



Deputi Polis Komisina Awan Sete i toktok na ol arapela bikman i sapatim em.

Raskol bagarapim na kilim dai mama long Bulolo

Ol asples bilong mama husat i dai long dispela bagarap i tok, pasin ol i mekim long mama husat i gat wanpela pikinini i no gutpela tru. Em i pasin bilong ol enimol stret na nogat rispek long mama.

Dispela dai i kamap long wanpela wik i go pinis taim mama i wok long kam bek long Bulolo taun bihain em i mekim sampela wok raun long hap.

Mama i gat 28 krismas na em bilong ples Saipan.

Tok i go olsem, ol birua i bungim mama long hap rot i go long ples we ol i holim em na pulim em i go insait long bus na bagarapim em.

Bihain ol i kilim em na kukim em long paia na haitim em ananit long ol kunai gras.

Tupela pikinini i painim bodi bilong em bi-

hain long sikspela de na toksave long ol polis we bodi i silip i stap.

Paia i kukim bodi bilong em nogut tru we ol i no inap luksave long pes bilong em. Tasol ol hauslain i luksave long lek bilong we i gat ol tatu makmak i stap na save olsem em dispela mama tasol.

Ol lain long ples i wok long painim em taim em i no kam kamap long ples long dispela de taim ol birua i bin holim em na bagarapim em.

Mipela save olsem em mama mipela wok long painim em long wanem ol tatu long lek bilong em.

Bulolo stesen Komada na Morobe provinsal Komada, Kaiglo Ambane i wok long karimaut wok painimaut long dai bilong mama na salim toksave i go long ol lain long ples na ples klostu long givim ol infomesen we i ken helpim ol long wok bilong ol.

I mas gat wok bung long stretim trefik

SIF bilong Polis Operesen, Ekting Deputi Komisina, Jim Andrews, i laikim gutpela rot sain i kamap long Pot Mosbi siti, bipo long namba 9 Saut Pasifik Gem i kamap long Julai.

Em i tok dispela hevi i bikpela samting bikos klostu olgeta rot sain long ol hap bilong tanim insait long siti i no stap o ol i brukim.

Mista Andrews i tok NCD Komisin, Len Trespot Bod na Dipatmen ov Lens na Fisikel Plening i mas wok bung wantaim polis na rausim ol dispela sain namel long 4-pela mun.

Em i tok moa olsem ol trefik rot sain long Pot Mosbi i no stap long wanem em i kamapim planti trefik eksiden, planti kar pulap na kar i bam na ol sitisen na ol lain save yusim rot i kisim taim.

Sif ov Polis i tok ol polis bai kamap

wantaim sekyuriti operesen long trefik we em ol atoriti i mas rausim ol sain long larim ol polis i go het long karimaut wok bilong ol.

Em i tok ol lain i save draiv i brukim trefik lo na draiv antap long ol hap we ol i tambu we i save skelim siti rot na Poreporena Freeway.

Na tu em i tok ol PMV bas i mekim ol ‘U’ tanim long ol hap we i tambu long tanim na ol i pakim ol kar long hap we i tambu. Dispela em i rong long wanem ol i brukim lo.

“Ol i mas sanapim ol nem bilong ol strit, na ol i mas pentim ol strit mak na ol mas stretim ol strit lait bipo long Gem,” Mista Andrews i tok.

Sif Polis i askim ol long miting hariap na stretim ol dispela hevi bipo long stat bilong 9 SP Gem long Julai.

JICA wantaim PPL i holim namba wan woksop

Esther Bralyn Wani i raitim

JAPAN Intenesenel Kopresen Ejensi (JICA) i makim NEWJEC long karim aut projek bilong Ramu Sistem Pawa Developmen Masta Plen na Lae Eria Distribusen Netwok Impruvmen Plen bai PNG Pawa Limited (PPL) i yusim.

NEWJEC i mekim tupela stadi we PPL bai yusim long ol sistem na long wokim gut ol netwok na putim pawa go long olgeta hap. NEWJEC em i wanpela ensinaring kampani na em i namba tu bikpela eneji kampani long Japan.

Dispela masta plen em i bai lukluk long pawa sot, pawa saplai i no kamap gut, hamas pipel bai yusim pawa na hai pawa lus.

Shigeru Sugiyama i makim JICA na tok tenkyu long ol tripela tim em PPL, Dipatmen ov Petroleum na ol yet. Em i tok ol i painim kos ifektiv we na painim aut hap we i no stret long bungim ol nid nau na long bihain.

Deputi Seketeri bilong PPL, Vore Veve i tok tenkyu na ol i amamas long NEWJAC long wok ol i mekim.



Ol memba bilong JICA, NEWJAC, PPL na Dipatmen ov Petroleum.

Ol tisa i no gat haus Fri edukesen long olgeta pikinini



Ol tisa sumatin i kam long Gerehu Sekenderi Skul i sanap long admin opis long baim fi na ol sumatin gat fi bilong las yia.

DIPATMEN bilong Edukesen i kisim sapot long UNICEF PNG long bung wantaim ol lain bilong mekim polisi long olgeta sekta long toktok long Aut-Ov-Skul Children Inisietiv (OOSCI) na kamap wantaim Edukesen Fo Ol (EFA).

Aut-Ov-Skul Children Inisietiv i bilong ol pikinini i no go long skul.

Dispela miting i kisim sapot long ol saveman long UNICEF Hetkwata long Nu Yok na Is Esia Pasifik Rijinal opis long Benkok na UNESCO Insitut ov Stestistiks (UIS) long Bangkok we i kamap long Mande long Pot Mosbi.

Seketeri ov Edukesen, Dokta Michael Tapo i tok as tingting bilong dispela miting em long mekim ol polisi meka long ol bikpela edukesen sekta long painim gutpela rot PNG i ken yusim risos long tokaut long ol polisi long kisim EFA gol long 2015 na go het.

Ol i toktok long ol gutpela samting i bin kamap long ol pikinini na givim Nesenel Dipatmen ov Edukesen long save moa long ol isu bilong OOSCI na developmen bilong pikinini na gutpela edukesen. Em i tok dispela pasin i mas kamap long Ministri ov Edukesen Plen bilong 2015 – 2024.

Em i tok ol i lukluk long ol pikinini i gat krismas bilong skul i no save skul em olsem 30 pesen o 600, 000, o husat i lusim skul na husat i no pinisim praimer skul.

“Edukesen sekta long PNG i lukim planti gutpela samting long ol yia wantaim ol net enrolmen senis long besik edukesen i go antap long 53 pesen long 2007 i go 74 pesen long 2013. Tasol sampela salens i stap yet,” Dokta Tapo i tok.

Em i tok dispela ol salens em olsem no gat skul klostu long ples, ol sumatin i no save stap longpela taim, na nogat

kwalati edukesen na ol i no save kisim ol sumatin i kam long rait taim na krismas.

Dokta Tapo i tok moa olsem wok bilong ol i no bilong kisim gutpela edukesen tasol long save olsem ol pikinini mas skul.

Em i tok moa olsem OOSCI bai helpim edukesen long mekim gavman long lukluk long Fri Edukesen we bai olgeta pikinini na meri mas go long skul na save long rit na rait bipo long 8-pela krismas.

Baba Danbappa i makim UNICEF long PNG, i tok ol i amamas long sapotim Dipatmen ov Edukesen long kamapim OOCI, na helpim ol skul pikinini long kwalati edukesen.

Dokta Tapo i tok olgeta sekta i mas gat gutpela luksave long save long ol hap i pasim ol pikinini i no skul na kamap wantaim ol polisi i ken rausim ol dispela banis. Em i tok dispela ol i ken kisim EFA gol.

Esther Bralyn Wani i raitim

GEREHU Sekenderi skul i go insait long namba 4 wik bilong skul nau tasol ol tisa i no gat gutpela haus long slip, prinsipal bilong skul, Martin L. Kenehe i tok.

Mista Kenehe i tok i gat 20 haus na 6-pela flet o liklik rum bilong ol tisa long skul graun.

Tasol 26 tisa tasol i save slip. Em i tok skul i gat 64 tisa olgeta tasol 38 tisa i save slip long ol setelmen na haus bilong ol wantok bilong ol.

Em i tok moa olsem long dispela Tuisen Fri Fi (TFF) polisi namba bilong ol sumatin i go antap na namba bilong ol tisa i go antap tu tasol no gat inap haus long skul.

Mista Kenehe i tok ol dispela tisa i slip ausait long skul long ol setelmen em i no seif na tu ol i no save tis gut long ol dispela i slip insait long skul. Dispela i ken givim hevi long ol sumatin we ol i no inap skul gut. Em i tok prais bilong baim rent tu i go antap long K200 na K250 we em i bikpela mani long ol tisa.

Ramu NiCo givim ol desk na sia long Enekuai skul

ENEKUI Praimeri Skul antap long Kurumbukari (KBK) maunten bilong Usino-Bundi distrik long Madang provins i kisim donesen long ol nupela desk na sia i kam long Ramu NiCo Menesmen (MCC) long las wik Trinde.

Dispela kampani i developim nikel/kobalt projek i givim ol 60 desk na 60 sia long ol sumatin bai yusim long sindaun gut long klasrum na skul gut.

Donesen i kamap long rait taim stret taim skul yia 2015 i stat.

Ol sumatin, tisa na ol papamama i amamas na bilas long welkamim Presiden bilong Ramu NiCo, Wang Jicheng wantaim menesmen bilong KBK Main husat i go long givim dispela donesen.

Prais bilong ol nupela desk na sia i moa long K8,000 na kampani i baim long BNBM Hadwea long Madang.

Long dispela de tu, Kampani i givim sampela donesen olsem spot bal na ol arapela samting bilong ol tisa i yusim.

Enekuai em i wanpela rilokesen



Ol skul sumatin na ol papamama i amamas long bung wantaim Presiden bilong Ramu NiCo, Wang

eria antap long KBK maunten we kampani i wokim long ol papagraun i go stap long en bihain long maining wok i kamap long eria bilong ol. Dispela rilokesen eria em ples skul i stap long en.

Mista Wang i tok kampani i luk-

save olsem edukesen bilong ol pikinini em i bikpela samting long helpim bihain taim developmen long dispela ples.

Em i tok olsem taim kampani i go antap long KBK maunten long 2006 i no bin gat skul i stap long

hap. Ples em bus tru na no gat planti manmeri.

Tasol bihain long developmen bilong wok maining i kamap, planti pipel i muv i go stap long hap we pikinini bilong ol i nid long go skul. Komyuniti lida na lenona asos-

esin memba, Michael Yori i bin givim bikpela tok tenkyu i go long Ramu NiCo, na em i autim tok amamas olsem Kampani i wok long bihainim komitmen bilong en aninit long memorandum ov agrimen (MOA).

Mista Yori i tok kampani i wok long luksave long nid bilong komyuniti tasol em i mas wok pastaim na ol helpim bai kam yet we pipel i mas mekim gutpela yus long ol samting ol i kisim long helpim sindaun bilong ol.

Em i tok edukesen bilong ol pikinini long Kurumbukari em bikpela samting long bihain taim developmen, na em i amamas olsem Ramu NiCo i luksave long dispela na i givim helpim.

Mista Wang i tokim ol pipel husat i stap long dispela seremoni tu olsem ol lenona asosesin bilong KBK i wanbel long Kampani olsem Enekuai praimer skul i mas kamap insait long rilokesen wantaim helt klinik, polis stesen na ol haus-kapa ol lokal pipel i ken stap long en na amamasim laipstail bilong ol.

PIH Siaman i amamas long opim nupela haus

Frieda Sila Kana i raitim

“WANPELA pikinini diwai i save gro na kamap bikipela diwai,” na Pasifik Intenesenel Haus sik (PIH) i mekim bikipela stori insait long helt sevis bilong Papua Niugini,” Siaman bilong Pasifik Intenesenel Haus Sik Sir Moi Avei i tok long taim ol i opim nupela PIH haus sik antap long 3-Mail maunten long NCD las wik Fraide 13 Februari.

Em i tok tenkyu long IPBC, Praim Minista, Peter O’Neill, Minista bilong Stet Enteprais, Ben Micah long opim dua bilong dispela Praivet Pablik Patnasip. Tenkyu tu long Robert Moore na ol seaholda long putim mani bilong ol long kirapim dispela haus sik.

Em i tok, i gat krangi tingting olsem PIH em i bilong ol lain bilong narapela kantri. Tasol nogat. Ol bikipela seaholda insait long PIH em ol Papua Niugini bisnis olsem MVIL, MRDC na ol narapela wan wan bisnis we i gat bilip long putim mani bilong ol i go insait long dispela gutpela sevis long kamap



Sir Moi Avei toktok long opim bilong nupela PIH long 3-Mile maunten.

strongpela graun long PIH haus sik i kirap.

“Long mi yet, mi lukim olsem i gat bikipela moa samting bai kamap long dispela haus sik olsem ol nesenel dokta na nes bai wok wantaim ol dokta na nes bilong narapela kantri. Ol bai kisim gutpela intenesenel trening long ol dispela dokta long yusim ol

masin bilong lukim na stretim ol bikipela sik,” Sir Moi i tok.

“I gat lidasip bilong Praim Minista i stap long strongim wok bilong kantri. Tasol dispela em i no inap. Gavman i no inap long mekim wok em yet. Em i nidim olgeta lain long givim han olsem, sapot bilong UPNG Helt Saiens. PIH i laik wok wan-

taim ol narapela lain i save mekim wok bilong helt sevis,” Sir Moi i tok.

Sir Moi i singaut long Nesenel Gavman long larim sampela sabsidi i kam insait long dispela haus sik long helpim ol lain husat i no gat inap mani long kisim gutpela helt sevis long dispela haus sik long stretim sik bilong ol.

PIH em i mak bilong pablik-praivet patnasip

Frieda Sila Kana i raitim

“BIKPELA senis long Pot Mosbi Jeneral Haus sik na Angau Memoriel em i narapela kain tru na em i mak bilong Pablik-Praivet Patnasip (PPP),” Mista Ben Micah, Minista bilong Stet On Enteprais na Memba bilong Kaviengi i tok.

Mista Micah i mekim dispela toktok long taim ol i bin opim nupela Pasifik Intenesenel Haus sik (PIH) long 3-Mail maunten long NCD las wik. Em i tok moa olsem, PIH i kirapim dispela bikipela haus sik i brukim nupela graun long bringim intenesenel stendet bilong helt sevis long kantri na em soim pablik-praivet patnasip wantaim MVIL aninit long IPBC i bin putim sabsimisen long kisim tok orait bilong graun long go het wantaim dispela haus sik.

Mista Micah i bin mekim luksave long Praim Minista Peter O’Neill husat i bin stap long opim nupela haus sik bilong wanem 13 Februari tu em i makim de mama i karim em long ples Pangia long Sauten Hailans.

“Fifti yia i go pinis, long wanpela liklik ples long bus bilong Pangia, wanpela mama i bin karim wanpela bebi boi na mama na ol kandre bilong en i bin wok hat long lukautim dispela bebi bai no ken dai. Nau 17 yia i go pinis, wanpela bebi wankain olsem i bin



Minista bilong Stet Enteprais, Ben Micah

kamap insait long tingting bilong dispela bebi boi husat i bin kamap long wanpela liklik ples long bus. Yu bin tingting i go pas long ol bebi na mama bilong ol long bihain, taim yu bin staitim dispela wok bilong kirapim dispela haus sik long maunten,” Mista Micah i tok.

“Dispela gavman i wok strong long givim “fri edukesen long olgeta

pikinini” tasol i gat narapela hap bilong developmen long fri na sabsidais helt kea em i bikipela samting tu,” em tok.

I no moa bai ol siklain i go long ovasis long kisim marasin o long kisim sekap long ol bikipela sik. PIH i bringim olgeta masin bilong sekim na stretim sik kensa, sik long lewa, sik long kru bilong het.

Global Fund bai helpim PNG yet long Malaria na TB

GLOBAL Fund, i kam gut gen wantaim US\$83 milien moa bilong mekim wok bilong Malaria, Tubekulosis (TB) na long kamapim gutpela Helt Sistem stat long yia 2014 i go long 2017.

Global Fund i bin stat wantaim US\$187 milien long yia 2004 long wok wantaim Gavman bilong PNG long wok bilong Malaria na TB.

Siameri bilong PNG Kantri Kodineting Mekenisem (CCM), Ledi Roslyn Morauta i



Ledi Roslyn Morauta.

bin tok long taim bilong sainim kontrak long Mande olsem em i amamas long Global Fund i laik helpim Papua Niugini yet. Olsem na em i sainim tripela nupela gren agrimen bilong US\$50 milien bai go inap 2017 long wok bilong Malaria, TB na long Helt Sistem.

Ledi Morauta i tok tenkyu long Eksekutiv Dairekta bilong Gobol Fund, Dokta Mark Dybul, na ol lain i makim Global Fund long kantri. Ol mani bilong Global Fund i kam long planti dona, na long dispela taim Australia Hai Komisina, na Embeseda bilong Yunaitet Stet na Yuropien Yunien i bin stap long makim ol dispela dona.

CCM i wanpela multi-stekholda bodi, we i makim Gavman, praivet sekta, sios, NGO, akademik institusen, multilateral na baileteral ejensi, na pipel husat i gat ol kain sik olsem HIV, TB na malaria we Global Fund i laik helpim

Ol lain stekholda we bai kisim bikipela hap bilong dispela gren em ol Rotarians Against Malaria na Populationa Service International long wok bilong Malaria, na World Vision long wok bilong TB. Gren bilong TB i kisim mani bilong bikipela karamap bilong strong Helt Sistem tu.

Siameri bilong CCM i luksave long bikipela invesmen, Gavman i putim long ol program we Global Fund i sapotim. Long ol yia namel long 2012 na 2014 gavman i putim mani mak bilong US\$62 milien olgeta. Em i tok moa olsem dispela mak bai i go antap narapela 78 pesen moa namel long yia 2015 i go long 2017, na i luk olsem mani mak bai go long US\$110 milien.

“CCM i amamas olsem PNG Gavman i mekim komitmen long wok bung wantaim helpim bilong Global Fund. Pastaim Global Fund tasol i save putim mani long olgeta wok bilong daunim ol sik insait long PNG tasol nau gavman i putim bikipela helpim i kam insait. Em i bikipela samting tru!” Ledi Morauta i tok.

Ledi Roslyn i tok tenkyu tu long Australia Gavman, World Health Organisation, na UNAIDS long ol teknikal sapot ol i wok long givim yet long CCM.

Tupela mani bilong malaria bungim wantaim US\$32 milien, na ol bai baim na givim aut 2.8 milien moskito net na long trenim ol komyuniti helt woka. Mani bai sapotim tu wok bilong sekim malaria, strongim monitoring na long kamapim gutpela lukaut bilong ol tarangu komyuniti.

Narapela US\$18 milien mani, bai i stap long han bilong intenesenel na Australia opis bilong World Vision. Dispela em bilong daunim sik TB long PNG. Ol bai yusim dispela gren mani long kisim ol nupela wok lain na long kamapim moa save long ol klinik woklain husat i stap pinis.

Em bai strongim ol sistem bilong mekim isi long ol helt woka na ol siklain long kisim sekap na marasin bilong HIV, TB na Malaria.

Ledi Morauta i tok olsem wantaim helpim bilong Gobol Fund long pastaim, na wantaim strateji bilong Nesenel Gavman, PNG i mekim bikipela senis long kempein bilong daunim malaria. Ripot bilong WHO i tok, namba bilong ol lain i kisim sik malaria i bin go daun long pastaim 12.1 pesen mak nau i go daun long 1.8 pesen.

Bikipela rot bilong winim dispela em long givimaut ol moskito net program. Klostu 82 pesen bilong wan wan haus nau i gat wanpela moskito net.

I gat planti moa TB sik i kamap tasol ol i wok long stap long marasin nau.

Ol lain i sainim ol pepa em Dokta Mark Dybul, Eksekutiv Dairekta bilong Global Fund, Gabriele Ganci, Kantri Dairekta bilong Population Service International, Ron Seddon, Siaman bilong Rotarians Against Malaria, Tim Costello, CEO bilong Wol Visen Australia, Curt Von Boguslawski, Kantri Dairekta bilong World Vision, Roslyn Morauta olsem Siameri bilong PNG CCM na Heni Meke, long makim ol sivel sosaiti ogenaesen.

Moa long 60 milien pikinini inap kisim bagarap long “nupela jeneresen” krais

UNICEF i putim aut apil long kisim mani mak bilong US\$3.1 bilien em US1 bilien moa long apil bilong yia i go pinis.

Dispela em i bikpela mani mak tru i winim ol narapela ol i save putim aut apil taim tasol em bilong helpim 62 milien pikinini husat i kisim hevi bilong graun.

“Ol pikinini long olgeta hap graun i bungim ol nupela kain hevi bilong taim nau, olsem long nesural disasta, pait namel long ol wanpela lain pipel na long ol bikpela sik i save kamap hariap. Kain hevi we graun i no bin lukim i kamap long bipo taim i kam,” Afshan Khan, UNICEF

Dairekta bilong Imejensi Program i tok.

Ol pikinini i stap wantaim hevi we i hat long stretim nau tasol. Kain olsem sik EBOLA epidemik, we i putim ol long hevi bilong pait, hangere, bikpela sik na ol narapela lain i ken bagarapim ol tu. Em i nidim moa risos long stretim.

I gat 230 milien pikinini nau i stap long ol kantri na long ol hap we ol pait man i bosim.

“Nau tasol mi kam bek long kantri Syria na Lebanon we planti pikinini i stap bagarap olgeta,” Afshan Khan, UNICEF Dairekta bilong Imejensi Program i tok.

“Insait long ol 4-pela yia i go pinis, ol dispela pikinini i bin lukim planti pait na dai

long wan wan de, na ol i bin wok long misaut long ol gutpela samting bilon glaip. Tasol dispela apil em i no bilong ol pikinini long Syria tasol, nogat. Em i bilong olgeta pikinini long wol husat i kisim hevi long pasin bilong ol narapela man.”

Humaniterien Eksen bilong ol Pikinini 2015 apil bai go long helpim 98 milien pipel long wol. Tupela hap bilong dispela namba em ol meri na pikinini, insait long 71 kantri.

Bikpela hap bilong dispela namba i stap long Syria na sab-rijon. UNICEF i singaut long kisim US\$903 milien long rijon bai inap long banisim na lukautim ol pikinini long hevi no ken kisim ol. Em bai

bringim ol samting olsem banis sut na marasin, gutpela klin wara saplai na senitesen, na edukesen.

UNICEF i laikim tu US\$500 milien long muvim wok bilong hap we Ebola bagarapim ol koyuniti. Ol bai yusim mani long strongim moa wok bilong ol long lukim wan wan siklain na putim ol long wanpela hap ol yet hariap. Em bilong stopim sik long em i no ken go moa long ol narapela.

Insait long kantri Nigeria, ol raskol i gat ol gan i kamap planti na i givim hevi long moa long 1 milien pipel long notis long ranawe long haus bilong ol. UNICEF i askim long kamapim \$US26.5 milien long wok helpim.

Ol meri Begesin stretim nesanel haiwe

James G. Kila i raitim

TRIPLELA meri bilong ples Ono long Usino lokal level gavman long Madang i soim strong bilong ol long helpim ol man long stretim bikpela bagarap i kamap long nesanel rot Madang-Ramu Haiwe.

Dispela tripela meri i wok wantaim 23 man bilong Ono viles long stretim bagarap i kamap klostu long Kawawar maket.

John Koti, wanpela eksekutiv insait long Inlen Paipain (Maigari) Lenona Asosin bilong Ramu NiCo Projek, i tok dispela wok i helpim ol tripela meri wantaim mani long sapotim famili bilong ol.

Ol meri i helpim ol man long pulapim ston long ol bikpela waia-basket long

stretim eria we graun i bruk na bagarapim rot, bihain long bikpela ren i brukim wanpela hap bilong haiwe rot. Dispela bagarap i givim bikpela pret long ol manmeri husat i ron long kar na PMV i go i kam long Madang-Ramu Haiwe.

Dispela rot em nesanel haiwe na em i kam aninit long lukaut bilong Nesanel Woks Dipatmen na gavman i mas lukluk long stretim taim bagarap i kamap. Tasol Ramu NiCo Menesmen (MCC) i luksave olsem slari paipain bilong en tu i stap klostu long dispela haiwe olsem na kampani i helpim long stretim.

Dispela eria i stap long 40-Kilomita paipain mak bilong Ramu NiCo.

Kampani i soim gutpela pasin tu taim em i kisim 26 lokal lain long kisim sotpela

taim wok long pulapim ston basket bilong strongim hap graun i bruk.

Kampani i yusim ol bikpela mesin bilong en long digim na klinim ples na bihain yusim bikpela kar long karim ol ston i go kapsaitim na ol wokman i pulapim ston basket long pasim strong graun.

Long las wik Fonde, Presiden bilong Ramu NiCo, Wang Jincheng i bin sekim wok bilong ol lain i wok long rot long Kawawar na i amamas long wok ol wok lain i wokim.

Em i bikpela wok, tasol Ramu NiCo olsem wanpela gutpela koporet bisnis insait long Madang, i givim taim na mani bilong en long stretim dispela rot we i save bringim sevis i go long ol pipel long komyuniti na long provins.



Yut, Meri na Famili
Pastor Barbara Lunge

Ol sakrifais we God i laikim

ATING nau laip bilong yu i stap olsem yu no save winim ol hevi bilong yu? O ating yu no wok long stap amamas insait long Kristen laip bilong yu wantaim Jisas?

Baibel i tok olsem i gat tupela ples we God i save stap. Aisaia 57:15 i tok, “...Mi stap antap tru long ples bilong mi yet. Tasol mi save stap tu wantaim ol manmeri i save daunim ol yet na sori long ol sin bilong ol, na mi save strongim bel bilong ol na mekim laip bilong ol i kamap gutpela gen.” Buk Song 51:17 King David i bin tok sori long sin bilong en na em tok long God olsem; “Orait God, mi daunim mi yet na mi stap aninit long yu. Dispela em i ofa bilong mi. Mi save, yu no givim baksait long man i pilim hevi long sin na i daunim em yet.”

Pasin na tingting bilong God em i save narakain long yumi ol man bilong graun. Planti taim ol Kristen man meri husat i no lotu o bihainim tumas pasin bilong God i save ting olsem ol bai senisim pasin bilong ol pastaim na kamap gutpela, orait ol i ken kam long lotu. Dispela em i giaman tingting. Baibel i tok long buk Rom 5:8 olsem, “Tasol yumi stap yet olsem ol manmeri bilong mekim sin, na Kraisi i dai bilong helpim yumi.

Long dispela pasin God i bin soim yumi olsem, em i laikim yumi moa yet.” Dispela em i min olsem maski yumi gat planti sin na i no stap long lotu longpela taim, God em i save amamas taim yumi daunim yumi yet na kam long em na tokaut olsem yumi mekim sin na yumi no gutpela long ai bilong em.

Buk bilong 1 Jon 1:9 i tok, “Tasol sapos yumi autim sin bilong yumi, orait God bai i mekim olsem em i bin tok. Em bai i mekim stretpela pasin na lusim sin bilong yumi. Na em bai i rausim olgeta pasin nogut i stap long yumi na mekim yumi i kamap klin.”

Em sakrifais we God i laikim. Pasin bilong daunim yu yet na tok sori long ol sin bilong yu. God bai stap wantaim ol dispela kain lain. Yu ken givim hevi bilong yu long God nau.

Sapos yu no inap long go long wanpela haus lotu o painim wanpela strongpela Kristen long pre long yu, orait yu yet ken nil daun, brukim skru na prea long God olsem tok bilong God i tok pastaim.

God bai kam stap insait long laip bilong yu na bai em i givim gutpela taim long yu ken amamas.

Toksave: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 70995378 o salim email long: lungeb37@gmail.com



Presiden bilong Ramu NiCo, Wang Jincheng i amamas long lukim ol meri i wok wantaim ol man long stretim rot bagarap long Madang-Ramu haiwe. Foto: James G. Kila

Wok strong long helpim ol famili na yut

Veronica Hatutasi i raitim

FAMILI, yut na long ol pater i save gut long ol doktrin o tising bilong sios em tripela eria we Pater Francis Koiamb SVD, i gat wari long ol na i wok strong long helpim kamapim gut.

Pater Francis bilong Jiwaka Provins long Hailans rijon i wok nau olsem wanpela misineri long Techiman Daiosis long Ghana, Afrika i autim ol tingting bilong em long ol dispela samting taim em i stori wantaim *Wantok Niuspepa* long las wik Fonde long Mosbi.

Pater Francis i mekim wok misineri long Ghana long 17 krismas nau, na em i amamas long stap na wok namel long ol pipel long hap.

“Mi amamas long wok namel long ol pipel long Techiman Daiosis na komyuniti. Ol pipel i lukautim mi gut. Long hap, ol pipel i save lukautim ol bisop na pater bilong ol,” Pater Francis i tok.

Em i bin mekim tok promis na kisim blesing long kamap long Februari 1997 na wanpela yia bihain long 1998, em i go long Ghana long mekim wok misineri



Pater Francis Koiamb.

long Arnold Jensen Peris, Not Nkoranza Distrik long Brong-Ahafo Rijon o provins.

Daiosis i gat samting olsem 42, 000 pipel na peris i gat 3,000 Katolik Sios memba long en.

Pater Francis i tok Katolik populesen long daiosis i wok long gro na insait log wan wan yia, 400 yangpela pipel i save kisim Santu Komyunio na 300 nupela bebi i save kisim Sakramen bilong Baptismo.

Em i tok provins na kantri i gat ol narapela lotu olsem Muslim,

Presbiterian, Metodis, ol Evanjelikal na Pentekostel, ol Tredisenelis na ol eties o lain i no save bilip long Bikpela.

Em i tok ol dispela sios i no gat hevi namel long ol, na Katolik Sios i save wok gut wantaim ol.

Em i tok ol Suni Muslim i laikim pasin bilong stap isi, na ol i no sapotim ol Islamik Stet (IS) husat i wok long kamapim hevi long wol long dispela taim.

Em i tok ol Katolik long peris na daiosis em i wok long en i holim strong long bilip bilong ol na olgeta moning na nait, ol i save wokim lotu.

Taim Pater Francis i toktok long ol plen bilong em, em i tok famili laip i wanpela we em na ol sios lei wok manmeri i wok strong long helpim bikos long ol kain salens we ol famili i bungim tude.

“Famili laip na ol famili bilong tude i gat planti salens, na planti i no stap gut.

“Olsem na mipela wantaim ol lei pipel i save bung na go aut long lukim ol famili na stori, toktok long ol wari na hevi ol i gat, na pre wantaim ol,” Pater Francis i tok.

Em i tok sampela peris i gat ol Liklik Kristen Komyuniti (LLK) na

tu, ol yut progrem. Pater Francis i laikim ol pater i mas save gut ol doktrin o tising bilog sios pastaim long ol i go skulim ol pipel.

“I moabeta long ol Katolik pater i stadim gut ol doktrin bilong sios pastaim na bihain, skulim ol pipel long en,” Pater Francis i tok.

Long wankain taim, Pater Francis i tok planti pipel long Ghana i holim strong yet long ol tumbuna bilip bilong ol.

“Ol i strongpela spirituel pipel na holim strong long ol tumbuna bilip bilong ol.

Ol i save pilim olsem ol spirit bilong ol tumbuna na ol daiman i stap klostu nap les ol i stap long en, na tu, long ol ples we ol i wokabout long en. Ol i bilip long spirit bilong graun, wara na ol arapela moa.

Em i tok ol dispela tredisionelis o bilip long ol tumbuna lain i save holim spirituel festival wanpela taim insait long wanpela yia.

Pater Francis i bin kam malolo long ples bilong em long Jiwaka na long las wik Fraide, em i kisim balus na lusim PNG long go long Ghana, ples we em i laikim na skruim wok misineri long en.

Sios i strongim helt na edukesen sevis

Veronica Hatutasi i raitim

EDUKESAN na helt em tupela bikpela eris we ol sios long Ghana i wok strong long ol, na kamapim gut ol.

Populesen bilong Ghana nau i stap long samting olsem 35 milien pipel.

Na long peris na daiosis we Pater Francis Koiamb SVD, wanpela man PNG i wok long en Brong-Ahafo Provins, Katolik Sios i wok strong long kamapim gut helt na edukesen sevis.

Pater Francis i tok kantri Ghana i wok long develop gut hariap bikos ol i daunim pasin korapsen.

“Ol bikpela rot i gat kolta na insait long las 15 krismas, kantri i wok long groa gut bikos ol i daunim korapsen,” Pater Francis i tok.

Em i tok kantri i gat ol kes krop olsem kakau na kesunat.

Em i tok ol pipel i no save stap nating, tasol ol i mekim hatwok, na strong tu long wokim ol maket.

Stendet bilong helt na edukesen sevis i no bin gutpela inap long yia 2000, tasol gavman i bin givim bek wok i go long ol sios olsem Katolik Sios long lukautim helt na edukesen sevis long helpim kamapim gut helt na edukesne stendet.

“Olsem na ol wanwan peris i wok long lukautim ol wan wan skul na helt sevis.

“Long sait bilong helt, ol SVD i lukim olsem pipel i painim hat long kisim gutpela wara bilong dring na kuk wantaim.

“Olsem na planti i bin gat sik ol i kolim long “Guinea worm” we wanpela bi-natang ol i kisim taim ol i dring deti o no gut i save kamapim.

“Ol SVD i wokim ol wara saplai na dispela i daunim sik Guinea worm, kolera na taifoid.

“Ol Holi Spirit Sister (SSPS) i wok long sait bilong ol bel mama na nau moa mama na ol bebi i wok long stap laip bikos mak long ol liklik bebi long wanpela de i go long 5-pela krismas na ol mama i save karim na i dai i go daun,” Pater Francis i tok.

Sampela samting we Pater Francis i lukim na amamas em pipel i stap helti na laip bilong ol i kamap gutpela, na ol i ken wok gut long helpim ol famili, komyuniti na kantri.

Em i tok tu olsem Ghana i gat hevi long soseri we ol i wok hat long daunim.

Pater Francis i tok long wanpela provins, i gat ol soseri kem we ol NGO na ol sios i lukautim ol lain we ol i sutim tok long ol olsem ol soseri lain.

Em i tok ol i save mekim planti long ol meri, moa yet long ol lain we ol man bilong ol i dai pinis.

Pater Francis i tok long peris em i wok long en, i gat tripela SVD pater na wanpela daiosis.

Ol i save lukautim 67 autstesen. Em i tok planti taim, ol i save wokabout mekim pastorel wok.

Em i tok taim em i go namba wan taim long Ghana na ol i putim em long Techiman Daiosis, em i no bin sik, sore na tingim ples bikos em i painim ol wantok long wanpela Filipino na narapela Indonesia pater.

Em i tok i no gat hevi long toktok bikos ol pipel i tok Inglis tu.

Em i tok nau em i save long sampela tokples na i mekim ol samting i orait moa.

Pater Francis husat i wok 17 krismas long Ghana i tok em bai go het wok long hap inap ol sios atoriti i laikim em long lusim hap.

Agape Yut makim ol nupela lida



Ol Agape Yut wantaim Papa Tiri (arere long rait han) kisim poto bihain long makim ol nupela yut lida long Sarere 14 Februari, 2015.

Frieda Sila Kana i raitim

AGAPE Intedinominesenel Ministri Yut Felosip grup long Taurama Veli Rot i bin statim 2015 program bilong ol long Sarere 14 Februari, na ol i makim ol nupela eksektiv lida bilong ol.

I bin gat 34 memba bilong sios yut grup i bin kamap long namba wan felosip miting bilong ol long haus lotu bilong ol na tok tenkyu na larim ol 4-pela olgeta yut lida i go na bihain ol i makim ol nupela 4-pela gen long go pas long ol long dispela yia.

Miting i bin stat wantaim singsing lotu na prea na bihain Yut Papa, Tiri Kana i bin autim wanpela tok bilong God i stap long buk bilong profet Maika 7:7 na long Jeremaia 29:11.

Elda Tiri i givim tok bilong strongim ol yangpela long ol i no ken les long pasin bilong kirap long taim ol bai pundaun long sin o hevi. Em i tok ol bebi taim ol i lain long wokabout, ol i save pundaun na kirap gen na i go yet. Ol i no save pundaun na les long kirap. Em i tok tu olsem God i makim ol pinis na wanem wok ol bai mekim em God i makim

pinis. Em ol gutpela samting na i no samting no gut.

Ol yut i tok tenkyu long olpela lidasip em Josiah, presiden, Arthur, vais presiden, Dorei, olsem tresera na Minoki olsem Seketeri.

Nupela lidasip ol i makim em ; Alvin olsem Presiden, Nathan olsem vais presiden, Deborah olsem seketeri na Ginete kisim wok bilong tresera.

Ol nupela lida i amamas long kisim dispela wok bikos em i nupela taim bilong ol i kamap lida bilong wanpela yut grup olsem.

Tasol Presiden bilong ol, Alvin

i tok ol i redi long kisim salens long lidim ol yut na ino long sait bilong spirit tasol, no gat.

Em long sait bilong bodi tu em i gat bikpela tingting long kamapim sampela projek wok long strongim ol yut long helpim komyuniti na long helpim ol ek-tiviti bilong ol yet.

Ol bai i no inap long wet tasol long ol papamama na sios bilong ol long helpim ol long taim ol i laikim sampela samting olsem musik samting ol long go aut long sampela narapela hap long mekim wok misin.

Sik TB i kamap bikpela moa nau long PNG


Sik TB i kisim ples pinis long Westen provins, Galp na NCD. Long pinis bilong 2014 i bin gat ripot olsem sik TB i kamap bikpela tru long Westen na Galp provins. Tasol ol ripot i kamap nau i soim olsem strongpela kain TB ol i kolim multi drag resisten (MRD) na ekstrim drag resisten tubekulosis (XDR) i kamap long Mosbi pinis na Pot Mosbi Jeneral Hospital i lukim ol sikman husat i gat dispela strongpela sik TB.

Ol lida bilong kantri i wari long bikpela bagarap tru sik TB inap kamapim. Praim Minista Peter O'Neill husat i bin go pas long pait egensim dispela sik las yia, i mekim strongpela tok lukaut. Praim Minista i tokim stret ol manmeri husat i gat sik TB long pinisim tritmen bilong sik, sapos nogat, bai ol i dai. Em i tokim ol famili bilong ol sik lain tu long lukim olsem sikman i pinisim tritmen.

Sik TB i save kamap bikos ol pipel i no lukautim ol yet. Long taim ol i sik, ol i no go hariap long sekap long klinik o haus sik long kisim marasin. Long taim dokta i givim marasin na putim ol long 6 mun tritmen, planti i save bikhet na no kisim moa marasin long taim ol i pilim orait. Dispela pasin i save kamapim strongpela drag resisten TB.

Pasin bilong yumi ol PNG tu long sindaun na slip klostu klostu na i no karamapim maus long taim yumi kus, em i wanpela rot bilong sik TB i kalap i go long narapela man. Pasin bilong spet nabaut em i narapela rot bilong givim sik long narapela man.

Sapos gavman i tok tru long stopim sik TB insait long PNG,



orait i mas gat bikpela program i kamap long skulim ol manmeri na skul pikinini long stopim dispela sik. Olgeta seksen bilong komyniti i mas wok bung wantaim. Ol skul i mas lainim ol pikinini long rot bilong abrusim dispela sik. Ol sios i mas skruim tok save i go long ol pipel long taim bilong lotu. Ol yut na meri grup i mas putim awenes long program bilong ol.

Bikpela awenes i mas kamap na i mas gat gutpela lida i go pas. Ol wan wan memba bilong Palamen i mas lukim olsem helt senta o haus sik long ilektoret bilong ol i gat marasin long givim ol siklain. Las wik long Lae, ol sikman i no inap kisim marasin long TB bikos klinik i pas na i no gat tok save.

Kost bilong baim marasin bilong stopim strongpela sik TB em i

antap tru. Mak bilong baim marasin bilong wanpela multi drag resisten TB sikman em inap olsem K8,400. Na mak bilong wanpela XDR TB sikman em inap long K38,000. Dispela i bikpela mani mak tru na PNG i no gat kain mani olsem long lukautim ol dispela sik lain. Gavman i askim pinis Australia long helpim na gavman bilong ol i tok orait. Long dispela wik

tu Global Fund i givim moa long K47milien long helpim ol wok bilong stopim sik HIV, malaria na TB i go inap long pinis bilong yia 2017.

Sik TB nau i kalapim mak na i surik i go antap. Ripot i tok olgeta yia i gat samting olsem 15,000 nupela sikman.

Na Mosbi siti i gat bikpela namba tru bilong ol sikman. Faiv pesen bilong populesen bilong PNG i stap long NCD, tasol i gat 25 pesen bilong ol TB sikman na meri i stap long NCD. Dispela em i mak bilong kamapim bikpela bagarap tru long helt bilong ol pipel sapos yumi no harim tok na helpim long daunim dispela sik.

Pot Mosbi Jeneral Hospital i gat nupela wod bilong ol TB sikman em ol bai opim long dispela mun. Bai i gat 60 bet long dispela nupela wod. Na gavman bilong Australia i tok bai em i helpim long ol wok bilong daunim sik TB long Westen provins.

I gat program bilong painim nupela het dokta long Daru Hospital long Westen provins, ol helt wokman bai go aut long ol ples, na bai i gat posisen bilong 10-pela moa helt dokta, distrik TB opisa na ol helt woka. Bai ol i sanapim wanpela 22 bet TB wod na moa mani bai go long baim ol TB marasin.

Minista bilong Helt i redi pinis imejensi ripot bilong sik TB na bai em i givim long kabinet long dispela wik long skelim na givim tok orait. Gavman wantaim ol intenesenel ogenaisesen i putim bikpela moa mani i go inait long stopim dispela sik.

Na yumi ol pipel tu i mas sapotim dispela pait bilong stopim TB. Stopim sik nau, dringim marasin na pinisim tritmen o bai yumi dai.

Monoitu Peris i mekim ol wok redi long selebretim 100 yia

Veronica Hatutasi i raitim

MONOITU Katolik Peris long Siwai, Sautwes Bogenvil i mekim ol wok redi nau long selebretim 100 yia senteneri selebresen bilong em.

Selebresen bai kamap long 6-pela krismas i kam na dispela em long yia 2021.

Namba wan misineri pater i bin go sindaun long Monoitu na kirapim Katolik lotu long hap em Pater Joseph Griswald bilong kantri Luxemburg long Yurop.

Bihain long em, ol pater bilong Gemeni, Holan na Amerika na ol Sister bilong Amerika i bin go wok misineri long Monoitu.

Peris i sanapim ol komiti long go pas long ol wan wan ektiviti o wok program olsem fan resing na ol narapela moa.

Peris i laikim tu ol lain bilong em i stap na wok long ol arapela hap bilong PNG na ovasis long helpim wantaim ol fan resing wok. Monoitu i wanpela bikpela



Liklik gel, Bianca i soim bagarap i kamap long dua bilong haus lotu.

peris i gat sios, skul na helt senta long en.

Sampela manmeri i bin skul long Monoitu Praimeri skul i kisim ol bikpela wok long ol narapela hap bilong PNG olsem Pot Mosbi na ol arapela hap moa.

Wanpela long ol em, Asbisop Sir Peter Kurongku, olupela asbisop bilong Pot Mosbi, tasol i dai pinis long Jun 1997.

Narapela em nau bosman bilong Pangtel, Charles Punaha.

Namba wan meri jiloljiss long PNG, Severina Soina, i bilong Monoitu Peris tu, na i gat ol arapela moa.

Em nau, peris i laikim helpim na i moabeta long ol pikinini bilong em i givim helpim i go bek long en.

Olsem na i moabeta long ol lain bilong Monoitu Peris i stap na wok long Mosbi long bung wantaim na kamapim tingting long mekim samting na kamapim fan resing long helpim wantaim ol wok long 100 yia selebresen bilong peris.

Wanpela samting i mas kamap pastaim em long stretim haus lotu we i go olupela na i gat ol bagarap na wok mentenens na penim i mas kamap.

Sapos yu bilong Monoitu Peris, o yu wanpela manmeri bilong narapela hap i laik givim helpim na yu laik kamapim sampela tingting, ringim dispela mobail namba: 72739408 na toktok long Veronica o email: vhatutasi@wantok.com.pg

Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela via. 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Man Australia joinim kristen milisia grup long Irak...

Poto i soim olsem man Australia long raithan namba 2, i sanap wantaim ol grup bilong em ol i kolim ol yet, "Self Sacrificers".

Islamik Stet:Wanpela Australia man i joinim wanpela grup ol i kolim "Self Sacrificers", o Dwekh Nawsha milisia insait long Irak. Em i singaut long intanesel sapot. Em joinim dispela kristen milisia grup long pait egen-sim Islamik Stet (IS) teroris grup long noten Irak. ABC i tokaut olsem man bilong Melbourne, Khamis Gewargis Khamis i joinim Assyrian milisia grup ol i kolim ol yet, Dwek Nawsha, i min olsem, Self Sacrificers.

Megot o binatang snek i kam bek long haus sik olsem marasin..



Megot binatang snek i kam long ples Kenya haus sik long Afrika. Nau ol dokta i yusim dispela binatang snek megot long stretim ol man i gat sik sua long bodi bilong ol manmeri. Dispela binatang bai kaikaim ol dai tisu long sua na lusim ol gutpela tisu.



Pis i gat tupela maus...

Pis i gat tupela maus: Dispela pis ol i kisim long Lake Bonney long Saut Australia Rivalen i kirapim planti tingting long dispela ples. Man husat i hukim pis, Garry Warrick i tok, taim em hukim pis, em i luksave olsem dispela pis i gat tupela maus. Antap maus i wok long pasim na opim, tasol daunbilo wan em i op tasol i stap.

Tupela man Australia wetim dai bilong ol...



Tupela kalabus man long Indonesia: Tupela man Australia, Andrew Chan and Myuran Sukumaran husat i kalabus long Indonesia i wetim dai bilong ol i askim ol atoriti long Indonesia long no ken salim ol i go long narapela kalabus inap ol i bihainim olgeta ligel askim bilong ol. Loya husat i go pas long tupela i tok no gat long tupela i go long narapela kalabus long stap na wetim dai bilong ol.

Laitim kendol long dai bilong tupela Jew man...



Planti tausen manmeri laitim kendol na sanap sore long taim ol birua i sutim dai nating tupela man long ples Copenhagen long Yurop. Ol sutim dai nating bilong tupela man bilong Jews.

Frosen beri frut i kamapim sik Hepataitis A...

Ol impoted beri fruit bilong Saina i kamapim sik Hepataitis A. Bikpela autbrek tru i kamap long Australia long sik Hepataitis A we i kamap taim ol frosen beri frut i kam insait long kantri. Ol arapela fud kampani i senisim frut i go insait long plastik paket long salim i kamapim dispela sik. Poto i soim ol paket we beri frut i kam long Saina i kamapim sik Hepataitis A.



Spaisman bilong Bogenvil

Veronica Hatutasi i raitim

SPAISMAN bilong Bogenvil, planti lain i save kolim dispela man Aropa long Sentral Bogenvil.

John Okia em dispela man. Em i lusim gutpela wok olsem Envairomen Saisentis wantaim Porgera long yia 2003, na i go bek long Bogenvil long helpim ol pipel bilong em.

Wantok i bin bungim Mista Okia long Buka na stori wantaim em. Ritim stori bilong em.

Mista Okia i bilong Aropa long Sentral Bogenvil.

Em i kolim liklik kampani bilong em, "Bougainville Herbs & Spices", na em i operet klostu long Aropa ples balus ol i bin opim bek long mun Desemba tasol las yia bihain em i bin pas moa long 20 krismas bikos long Bogenvil pait.

Mista Okia i bin skul long eria bilong

saiens na pinisim skul bilong em long Yunivesiti bilong PNG na i bin greduet long 1979.

Long 2006 na 2007, gavman bilong Nu Silan i bin sponsaim em na em i go skul long Massey Yunivesiti we em i bin wokim Post greduet stadi long Egrikalsa Saiens.

Bihain long em i pinisim skul long Nu Silan, em i bin go bek long Aropa, Sentrel Bogenvil long kirapim spais bisnis bilong em.

Nau em i save salim ol spais prodak long Arawa, Buka na ovasis long ol ailan long Pasifik.

"Mi lukim olsem i gat nid long spais bisnis long Atonomas Rijon bilong Bogenvil na i moabeta long ABG i lukluk long sapatim ol liklik manmeri long dispela eria.

"Bogenvilem i gutpela klaimet, planti ren, wara na san long groim ol spais.

"Ol spais plent mi yusim long wokim spais em long tumerik, pepa (Pepper), sinamon mi save kisim long India, natmeg na lemon," Mista Okia i tok.

Mista Okia i save salim ol spais long ol restron, ges haus na ol kaiba long ol ples olsem Arawa na Buka na long ol narapela hap long ailan i kisim askim long en. "Moa long salim ol prodak bilong mi long Bogenvil, mi save salim ovasis long ol Pasifik kantri olsem Solomon Ailan, Fiji na Vanuatu," Mista Okia i tok.

Em i gat liklik masin we em i save miksim ol spais na redim long putim long ol 50-60 grempek.

Pinis prodak em i save salim namel long K8 na K10.

Em i save baim ol spais long ol fama long ples long wokim spais prodak bisnis bilong em.

Mista Okia i tok em i laik promotim dispel bisnis long rurel level olsem wan-

pela rot we ol pipel i ken mekim mani long en. Wanpela eria we em i laik fokus long en em long kirapim wanpela faktori na ol i ken wokim ol spais long Bogenvil yet, na i no long ovasis.

"Long promotim spais bisnis long Bogenvil, volium i mas go antap, o pipel i mas planim moa spais na bai i gat inap long wokim ol spais prodak long Bogenvil yet," Mista Okia i tok.

Em i tok long Bogenvil, kakau em wanpela krop ol pipel i strong long planim.

Tasol em i tok bikos long sik Kakau Pod Bora (CPB) i bagarapim kakau na pipel i wari, spais bisnis em i wanpela eria we ol i ken lukluk long en olsem narapela rot long mekim mani long en.

Em i tok wanpela rot we ol pipel long Bogenvil i ken bihainim long planim ol krop em long "Intergrated technique" we ol i ken planim ol spais plent namel long ol lain diwai kakau.



KASTOMA: Mista Spaisman wantaim Philo, wanpela kastoma na mama bilong CJS Kaiba long Buka. Philo i wok long baim sampela spais prodak.

SPAISMAN BILONG BOGENVIL: John Okia i soim ol spais prodak bilong em we em yet i wokim na putim long peket na salim.




OL SPAIS PRODAK: Ol dispel spais peket em Mista Okia yet i wokim na putim long peket long Bogenvil na i wok long salim. Em i olsem tasol ol dispel ol i wokim long faktori.



4-MEKIM KLIA: Mista Spaisman i wok long mekim klia sampela samting long Philo.

Stori bilong tumbuna



Snek i lusim gras

Bipo tru tru, kapul tupela snek i bin i stap gut tru. Tupela i no save kros. Tupela i pren gut tasol. Tupela i save wok na pilai wantaim. Wangepela taim nau, bikpela king bilong olgeta abus i bin singautim wangepela bikpela bung bilong olgeta abus bilong kam na harim tok bilong em.

Snek i kirap na i tok, "Pren, ating mitupela i mas bilas na go long harim toktok bilong yumi. Mitupela i mas katim gras bilong mitupela na bai mitupela i luk smat liklik." Kapul i tok, "Pren, yu katim gras bilong mi pastaim. Bihain mi katim bilong yu gen." Snek i strong tumas long kapul bai i katim gras bilong em pastaim.

Orait, kapul i kirap i kisim sisis na resa i stat long katim gras bilong snek. Kapul i no bin mekim gutpela pasin long snek. Em i no larim wangepela gras bilong snek i stap. Em i katim olgeta.

Taim em i katim pinis, em i tok, "Pren, yu lukaut liklik. Yu no ken go klostu tumas long ol meri, bai yu bagarapim tingting bilong ol meri. Taim snek i go na lukim em long glas, em i save pinis pren bilong em i bagarapim gras bilong em pinis.

Em i belhat nogut tru, tasol i no tok long pren bilong em kapul. Taim kapul i askim em, "Olsem wanem pren, yu lukim yu long glas i orait?" Na snek i tok, "Yes, pren, yu katim gras bilong mi i luk nais tru.

Nau i taim gen bilong snek bilong katim gras bilong kapul. Snek i tok long em yet, "Pren yu bagarapim gras bilong mi, na bai mi katim gras bilong yu olsem mi tasol." Snek nau i kisim sisis na resa gen na i stat long katim gras bilong kapul.

Em i stat pastaim long tel, na i kam namel long tel na taur i kraibilong singautim olgeta abus long go klostu long bung. Na snek i tok, "Pren, mi no pinisim yet gras. Olsem wanem? Bai mitupela i go long bung pastaim, bihain long miting bai mi pinis katim gras bilong yu?"

Taim tupela i go kamap long bung, olgeta abus i lap nogut tru long tupela long gras bilong snek i pinis olgeta na bilong kapul long tel tasol. Olsem na yu ken lukim kapul na snek tupela i gat sem namel long tupela. Sapos kapul i lukim snek bai em i go hait. Na snek i lukim kapul bai i ranawe.

Bipo, snek i bin gat gras long en, nau i no gat moa gras. Olsem tu long kapul i wankain long tel bilong em, tasol nau tel bilong em i no gat gras.

Stephen Gai i raitim

Raun wantaim Wantok kru ...

Singa na danis kwin bilong USA bai laitim Lamana

PLANTI long ol fen bilong dispela yangpela stail singa, model na danis meri bilong Amerika bai gat bikpela sans long lukim pilai na danis laip long neks wik Sarere long Gold Klap long Lamana.

CIARA, em wangepela bilong meri Amerika we singsing bilong em i wok long pairap long olgeta hap long wol.

Dispela meri tu em hap meri bilong danis. Em ken mekim kain kain danis na bai yu ting olsem em no gat bun long bodi bilong em.

Ciara tu i save mekim model na taim em save dres

long soim ol klos em i save putim planti man save laik long kilim ol yet long dres bilong em.

Dispelabai namba wan taim em i kam long PNG na em bai pilai wangepela nait tasol long Gold Klap 21 Februari 2015 na ticket ol salim pinis long Lamana fran desk.

Tiket bilong dispela so inap long K200 long arena na K300 long balkoni. Sapos Ciara em fen bilong yu, yu mas kisim tiket bilong nau long wanem spes i liklik nau long wok kirap bilong Gold Klap.

Buai gaden bilong yangpela man Simbu i kam gut

James G. Kila i raitim

WANPELA yangpela man bilong Gembogl, Simbu provins, **Tobby Kuka husat i stap nau long Sisiak long Madang taun i soim tru kala na piksa long ol arapela Hailans lain olsem bagaros i gat buai gaden em yet i planim na stat long kaikai nau.**

Dispela stail bagaros bilong Hailans i soim olsem maski buai em i samting bilong ol lain long nambis, ol hailans husat i stap nabaut long nambis i ken planim arere long haus bilong ol na kaikai long en.

Stori bilong Tobby i bin stat taim em i stap long Madang Teknikol Koles long 2011. Wangepela tingting i kisim olsem em i mas planim buai long liklik blok em i stap long en long Sisiak. Dispela strongpela yangpela man i planim 79 kuru buai raunim eria em i stap long en

"Buai na kokonas em bilas bilong Madang arere long haus olsem na mi tu i laik soim kala bilong Madang long eria bilong mi," Tobby i tok.

Bihain long foapela krismas, planti long ol dispela buai i bikpela pinis na karim prut na sampela i putim plaua pinis we i mekim bel bilong dispela yangpela man hailans i amamas tru.

Long las wik Sarere, Tobby i rausim namba wan rop buai long wangepela diwai em i planim. Amamas long bel bilong en i bikpela tru na bagaros Angra bilong Simbu i karim rop buai ya i go serim wantaim ol wanwok na poro bilong em long Raibus Ensiniaring. Em i tok pilai na tu salensim ol arapela wanwok bilong em long hailans olsem maski olsem buai em samting bilong

ol nambis lain, man hailans tu i ken planim na kaikai long en.

Dispela bagaros bilong Simbu i tok em i amamas bikos nau bai i no inap westim mani long baim buai. Bikos ol diwai buai i gro na karim pinis na em bai kisim buai kaikai long ol, na sampela bai em bai salim na kisim mani," Tobby i tok.

Long nau yet, planti lain long hailans i save laikim stret long kaikai buai. Sampela ol bikman meri bilong Hailans i winim stret

long ol lain long nambis long kaikai buai.

Buai i kamap olsem gol o bikpela samting tru long laip bilong ol, na planti taim ol buai baiya blong hailans i save brukim tutak na bikpela ren na tait-wara, na ron long PMV trak na bas longpela hap tru long go painim buai long Madang na ol arapela ples long nambis eria.

Sampela ol dispela lain 'Jebu' i save katim solwara long moto bot tu long go painim buai.



Tobby Kuka i soim namba wan hap han rop buai em i serim wantaim ol wanwok na poroman.

Poto: James G. Kila

THE PARTY CAPITAL PRESENTS

Ciara

Lamana Hotel
The Gold Club

SAT 21 FEB
LIVE ON STAGE 10PM

Tickets available ONLY at Lamana Hotel's reception ARENA K200 & BALCONY K300
For more info contact Jacquie or Sue goldclub@lamana.com.pg ph: 3124555

FR, Castor & Ford, JG, Sea City

TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG* o email edres : editorial@wantok.com.pg Telepon namba: 3252500.

Tenkyu

RAUN na TOK PILAI wantaim KANAGE



Sudoku

4		9	8		2
	6	5		8	
3			7		5
			5	9	6
	9		1		7
2	3		8		
7	6				5
	4			5	1
5		8	1		9


9			9	9		9
	9		9			
	9	9				9
2	4	3	8			
9	7				8	1
			9	5	2	4
	6				5	2
		4		2		8
2		1	5			9

Ansa bilong Sudoku # 79 na # 80 neks isu


Ansa bilong las wik Sudoku # 76 na # 77

9	8	1	3	5	7	2	6	4
7	5	2	4	6	8	9	1	3
4	3	6	2	9	1	7	5	8
6	2	9	5	3	4	8	7	1
5	7	8	1	2	9	4	3	6
3	1	4	8	7	6	5	9	2
8	4	7	6	1	5	3	2	9
1	9	3	7	8	2	6	4	5
2	6	5	9	4	3	1	8	7

3	2	4	9	1	3	6	8	7
5	1	7	4	6	9	2	8	3
8	9	6	3	2	7	4	5	1
9	7	3	2	5	8	1	4	6
6	5	2	7	1	4	3	9	8
1	4	8	9	3	6	7	2	5
2	6	9	5	4	3	8	1	7
4	3	5	8	7	1	9	6	2
7	8	1	6	9	2	5	3	4




- Antap**
- Ol wantok bilong Jisas
 - Ples bilong wokabaut antap long wara
 - Strongpela kantri long wol
 - Pilim het i raun
 - Solwara i kirap
 - Fam autsait long Mosbi
 - Ol pilai samting bilong pikinini
 - Liklik kantri long Yurop
 - Lukluk hait
 - Sayor i save mekim aiwara kapsait
 - Ox & Palm tin i gat foapela
 - Ai, nus na maus i stap long en
 - Tul bilong katim plang
 - Switpela kaikai
 - I no hatwok
 - Namba wan man
 - Wanpela politikal pati
 - Karamap bilong kokonas
 - Mekim wok bilong lukautim sikman
 - I no inap harim toktok
 - Bihain long namba wan
 - Yunaitet Nesens
 - Kontrol bilong kar
 - Wanpela spot
 - Malo bilong ol bebi
 - Ol soldia
 - I pas strong
 - Bikpela wara
 - I save wokim ti i swit
 - Transpot bilong wara
 - Wanpela kaikai
 - I no stap long gavman
 - Ples slip long bus
 - Soim amamas
 - Strongpela samting
 - Ples bilong dring
 - Mani plen
 - Politikal pati
 - Kad bilong mobail fon
 - Taitel bilong senia polisman
 - Wokman bilong sios
 - Poro bilong daka na kambang
 - Poro bilong buai na kambang



- Daunbilo**
- Saveman bilong lo
 - Wanpela wara long Morobe
 - I gat seenpela long wan wik
 - Taun long Bogenvil
 - Yu yet
 - Liklik tamiok
 - Wanpela tokples long Nu Ailan
 - Haus kalabus long Mosbi
 - Yau
 - Sia bilong Palamen
 - Ain o plastik we wara i ken ran long en
 - Susa bilong mama o papa
 - Intenesenel Leba Ogenaisesen
 - Givim biknem na rispek
 - Tul bilong katim laplap
 - I no autsait
 - Bihain long moning
 - ... Alaiens Pati
 - Givim oda
 - Pilai laki
 - Bikpela de bilong ol Kristen
 - Namba faiv mun
 - Ples i stap long het bilong wara
 - Wankain olsem 38
 - Ol rul
 - Wanpela ples long Nu Ailan
 - Namba i bihainim faiv
 - Sik skin i hat
 - Bikpela ges bisnis long PNG
 - Ples bilong salim pas
 - Brata bilong Moses
 - Abus
 - Mani masin
 - Tupela i stap long pes
 - I go bikpela
 - Bokis bilong pilai musik
 - Tul bilong rait
 - Provinsal Edministreta

- Sindaun long en
- Karamap bilong haus
- Vinega
- Renk bilong ami
- Dring
- Ol soldia
- Lain i makim maus bilong kampani
- Tenkyu
- Bilas bilong lek

Ol Raun Nabaut Poto



Meri wina long CPL Praid ov PNG i werim billum dres we ol meri PNG nau i save wokim planti na salim long K100 na moa.



Palamen Memba bilong Pot Mosbi Saut Ilektooret na Minista bilong Spot na 2015 Gems i givim ol mani i go long sampela lain long ilektooret bilong en long wokim ol liklik bisnis bilong helpim sindaun bilong ol.



Luk Mek, Sekulesen Menesa bilong Wantok Niuspepa i givim prais long wanpela wina bilong Wantok Ridasip sevei resis.

Mi gat wari na mi laik helpim

Tingting planti long God na prea

Dia Laipain,
Sampela taim mi save ting olsem God i no save bekim ol prea bilong mi.

Mi save smuk, gembol o pilai tasol nau mi stop taim mi kisim Jisas olsem Lord na Sevia bilong mi tripela yia i go pinis.

Mi bin bungim gelpren bilong mi long dispela taim na mi bin pre long em i ken kamap olsem patna bilong mi long bihain taim na stap amamas wantaim.

Tasol nau yet, mi painim aut olsem em i wok long prenim narapela mani na stap wantaim em tupela mun nau.

Mi painim aut olsem man em i raun wantaim em i no laikim em, tasol meri i laikim em tumas.

Dispela pasin em wokim i no gutpela.

Oltaim mi ting mi tasol i wanpela mangki long laip bilong em tasol nogat!

Ol hauslain bilong mitupela i save long prensip bilong mitupela na ol lain bilong em i laikim mi tupela long marit, tasol mi no save long tingting bilong em nau.

Mi save pas long em tasol na mi ting olsem em i laikim mi.

Olsem na nau tingting bilong mi long mitupela bai marit bihain i stap nating na wetim wanem samting bai kamap bihain em i wokim dispela kain pasin long mi.

Olsem wanem na Bikpela i givim mi dispela pen na larim prensip bilong mi tupela i bagarap long dispela kain samting?

God i save bekim prea olsem? DESPONDENT

Dia Pren,

Yu bin tokaut olsem yu wanpela trupela Kristen, tasol yu no inap long save pasin na we bilong God bikos long gelpren bilong yu i no soim trupela laikim long yu.

Mipela i sori tru long wanem hevi yu stap long en bikos long dispela, yu ting olsem God i no save ansarim ol prea.

Orait yu tok olsem, long wanem samting stret yu prea long en na askim Bikpela o God na em i no bekim yu?

Yu bin prea long em bai lukautim prensip bilong yu tupela o no gat?

God i save bekim ol prea tasol i no long rot yumi save laikim long em.

Sampela taim, God i bekim prea hariap, sampela taim bihain o sampela taim em i no save givim wanem samting yumi askim long em.

I gat as bilong dispela samting olsem wanem na God i mekim dispela long yumi taim yumi no laikim long kamap, tasol i kamap long wanem samting yumi askim em long prea na laip bilong yumi.

Dispela em bikos God i save long yumi gut tru, (Rom 8:28) na long Hebrew 13:5b i tok olsem, "em bai no nap lusim yumi o larim yumi stap nating."

God i laikim yumi tumas tasol em i no tokaut long yumi i no nap kisim pen taim yumi stap olsem ol kristen manmeri long graun, ritim Isaiiah 29:11. God i laikim yumi tumas na i givim wanem samting i gutpela bilong yumi na ol salens em i givim bilong strongim yumi na i no long bagarapim yumi olsem tasol antap tok skul bilong Baibel long Rom 8:28 i tokim yumi long wok God i mekim



long gutpela bilong yumi.

Yu ken lukim olsem sampela lain o Kristen i save blemim God o narapela long rong bilong ol.

Long wanem na ol pipel i save mekim olsem?

Pren dispela em i stap pinis long Baibel.

Taim yu ritim olgeta taim dispela tok bilong God, em i ken helpim yu wantaim Holi Spirit long save long we na pasin bilong em.

Taim yumi lukluk ken long wanem samting i kamap long gaden bilong Eden, olgeta dispela samting i kamap long giaman tok bilong satan tasol.

Long dispela hap Adam i sutim tok long God olsem, "dispela meri yu givim long mi i givim dispela pikinini diwai na mi kaikai Jenesis 3:..12 na 13. Olsem tasol Eve i blemim Satan.. "dispela sinek i giamanim mi na mi kaikai."

Sapos yu go bek long Jenesis wan long kriesen God i givim Adam na Eve tasol wanpela samting tasol em i tambuim tupela long no ken kaikai em dispela diwai i givim save long wanem samting i gutpela na wanem samting i nogut, Jenesis 2:..16/17.

Taim man i mekim sin o pekato, prensip bilong em wantaim God i bruk na God i salim em i go aut long gaden ov Eden hap we samting i fri.

Em i tokaut long jasmen bikos long tupela i harim tok, Jenesis 3:14 na tupela i wokabout wantaim hevi o wok hat long stap laip.

Pren, long dispela, Adam i brukim prensip bilong em wantaim God.

Mipela i laikim yu long kisim taim long ritim ol dispela skripta mipela i tokaut pinis long en long helpim yu long save long laip bilong yu olsem pikinini bilong God (John 1:12)

Pren, i gat as God i ansaim ol prea sampela taim na taim we yu ting em i no save harim yu. Olgeta dispela, em i wok long lukluk long olgeta hevi yumi gat na em i wetim sapos givim laip bilong yumi long em long dispela graun wantaim prea na gutpela wok bilong em.

I gat planti skul tok i stap long Baibel we i toktok long prensip wantaim God na prea em i wanpela bilong ol dispela impoten samting long laip bilong ol kristen manmeri. Mekim taim long ritim stori bilong Job insait long olpela Testamen. Em i wanpela feifful man bilong God tasol em tu i kwestenim God na ol pren bilong em, meri bilong em na olgeta samting bilong em bagarap taim bikpela birua i kamap long wokabout bilong em wantaim God.

Bihain long hevi em i bungim wantaim God na ol samting bilong ol i lus, dispela taim em i tok sori long God olsem em tasol i God na em i save long wanem samting i gutpela bilong mi na em i senisim pasin.

Long dispela God i givim em ol samting bilong em moa long ol em i gat long bipo.

Yu ken ritim stori bilong Job sapta 42 na i go moa olsem Joseph (Genesis sapta 37 i go long 50) stori bilong Daniel long sapta 6, man husat ol i tromoim em i go insait long hol bilong laon bikos long feit na prea bilong em long God i Bikpela na long Nupela Testamen Jisas na ol disaipel bilong em.

Olgeta i bungim ol salens bilong laip long wanpela na narapela tasol ol i no givap long bilip bilong ol long bihainim Jisas i go i nap pinis bilong stori bilong ol.

God i save helpim yumi long luksave long bihain taim bilong yumi.

Taim yumi abrusim ol hevi, pen na traime bilip na hop i kamap strong gen.

Yumi soim pasin laikim na komitmen long bilip long tok tru bilong em.

Pren, i gat wanpela tok i olsem "no pain, no gain," wanpela bilong ol Kristen man i save raitim stori Philip Yancey i rait long buk bilong em na, ("Where is God when it hurts") God i stap we taim i gat pen?

God i laikim yumi i mas laikim em, we ol rot yumi kisim i gat pen bikos yumi givim yumi yet long God i no bilong filings na wanem samting yumi kisim.

Em i laikim yumi tingting long em na stap wantaim em oltaim maski yumi gat rait long sutim tok na giaman em.

I luk olsem gelpren bilong yu i no stap tru wantaim yu long we na pasin bilong em yet na yu mas wanbel olsem em i no God i bagarapim prensip bilong yu wantaim em.

Gelpren bilong yu tasol i ken tokim yu olsem bilong wanem na em i mekim olsem na yu i tu mas toktok gut tru wantaim em long wanem hevi yu stap long en.

Yu ting olsem dispela meri i olsem yu bin laikim long maritim o bai kamap meri bilong yu? I tru, God i soim pinis mipela long wanem samting long en.

Pren, mipela i laikim yu long lukluk sapos yu ken stil kisim dispela meri olsem pren bilong yu.

Sapos i olsem, orait em i mas soim olsem em i bin mekim rong long raun wantaim narapela mangki.

Dispela bai i givim sampela gutpela tingting long fogivim em na helpim long save wanem samting em i bin mekim rong.

Sapos yu tingting long lusim em, orait mipela tu laikim bai yu mas i pogivim em olsem wanpela kristen na larim em i go wantaim gutpela bilip.

Bilong lusim tingting long asua narapela i mekim long yu i ken stretim ol hevi na wari na bringim gutpela sindaun we bai i promotim bilip laip bilong yu wantaim God long nupela level.

God i save harim prea na ansaim ol long we na taim bilong em bilong gutpela bilong yumi.

Mipela i tokim yu long tingting bilong kisim helpim na mipela i askim yu long go het long trastim God, Proverbs 3: 5,6 long wanem em i laikim yu tumas.

Na i laikim bai yu ken i gat gutpela laip na gutpela pren long laip bilong yu.

Pren bilong yu, Laipain

Sapos yu gat wari o hevi, rait i kam long dispela etres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.
Laipain

PNG loya sutim tok long Australia

WANPELA Human Rait loya bilong Papua Niugini i sutim tok long Australia long pasim ai bilong en long Indonesia i wok long bagarapim ol humen rait bilong ol pipel bilong Wes Papua long moa long 55 yia nau.

Paul Harricknen na Dokta Eric Kwa, Seketeri bilong PNG Konstitusenel Lo Rifom Komisin i mekim dispela tok.

Mista Harricknen i mekim dispela toktok taim Australia i wok long askim strong Indonesia long no ken kilim tupela sitisen bilong en long karim hait ol drag.

Mista Harricknen i tok em i luksave olsem Australia i wari long dispela tupela sitisen bilong en, tasol Australia i no wari long moa 500,000 pipel bilong Wes Papua i dai pinis long han bilong gavman bilong Indonesia.

Tude gavman bilong Indonesia i bin askim ol gavman opisa bilong Australia long go toktok long bihain taim bilong tupela man Australia, Andrew Chan na Murian Sukumaran. Tupela i brukim lo bilong haitim drag na i laik karim i go insait long Australia.

Praim Minista bilong Australia Tony Abbot i bin askim strong Indonesia long no ken kilim dai dispela tupela man.

Mista Harricknen i tok Indonesia em i namba wan kantri long wol long husat i no save tingting long human raits bilong ol manmeri.

Em i tok Australia i save sindaun isi tru na i no save toktok long human raits bilong ol Wes Papua em Indonesia i save bagarapim stat long 1960 samting i kam inap nau.

Toktok bilong Paul Harricknen i kamap tu long wanpela kain we PNG i tokaut tu olsem em bai stat long kilim ol kalabusman husat i wet i stap long dai bipo long pinis bilong dispela yia.

PNG i bin tok orait long kilim indai ol pipel husat i kilim ol narapela long traim stopim ol pipel long stopim dispela kain pasin. Nau ol nius ripot i tok Indonesia na Tailan husat i gat dispela lo i tokim PNG olsem tupela i ken helpim PNG.

Tasol Seketeri bilong Konstitusenel Lo Rifom Komisen (CLRC) long PNG Dr Eric Kwa i tok em i sapatim dispela lo bilong kilim ol kalabus em gavman i laik bihainim.

Moa pipel long PNG i yusim mobail fon

MOA pipel long Papua Niugini i save yusim mobail fon nau na 80 pesen bilong kantri i gat mobail fon sevis.

Joseph Suwamaru, wanpela leksera long Infomesen Komunikesen Teknologi long

Divine Word University i toktok wantaim Sam Seke bilong ABC.

Em i tok mobail fon i helpim gut tu ol pipel long toktok wantaim ol famili, wantok na poro bilong ol long olgeta hap bilong kantri, na i helpim gut tu long eria bilong bisnis.

Joseph Suwamaru i bin wokim wanpela wok painim aut long pasin ol pipel i save yusim mobail fon long kantri.

Mista Suwamaru i tok sampela pipel i tokaut tu long wari bilong ol long sampela nogut samting we mobail fon i save kamapim long komyuniti.

Tasol em i tok mak bilong ol pipel husat i save yusim mobail fon long PNG i wok long go antap.

PNG i helpim Solomon Ailan

GAVMAN bilong Papua Niugini i gohet long helpim Solomon Ailan aninit long developmen asistens program bilong tupela kantri.

PNG Foren Afeas Minista Rimbink Pato i bin go strongim wok poroman wantaim Solomon Ailan.

Chris Leua deputi seketeri bilong Praim Minista bilong Solomon Ailan i tokim ABC Nius olsem

gavman bilong Solomon Ailan na Papua Niugini i amamas long strongim wok poroman namel long tupelo kantri.

Ol i bin strongim dispela poroman pasin taim Foren Minista bilong PNG, Rimbink Pato i bin lukluk raun long Solomon Ailan long wik i go pinis.

Mista Pato i bin go toktok wantaim Foren Minista bilong Solomon Ailan Milner Tozaka na Praim Minista Manasseh Sogavare.

Deputi Pres Seketeri bilong Praim Minista Sogavare, Chris Leua i tok ol lida i bin toktok long wok bung namel long tupela kantri na tu long helpim PNG i save givim i go Solomon Ailan.

Mista Leua i tok PNG givim planti milien kina long helpim Solomon Ailan long wan wan yia na planti mani i go long edukesen.

Sevis niusman long Vanuatu i ritaia

WANPELA niusman bilong Vanuatu husat i save strongim wok bilong fridom bilong media i ritaia nau long bilong em.

Marc Neil-Jones, husat i pablisa bilong Vanuatu Daily Post i toktok wantaim ABC long dispela wik.

Marc Neil-Jones i pablisa bilong namba wan niuspepa bilong Vanuatu, Vanuatu Daily Post na em i gat Buzz FM redio stesin long Port Vila.

Neil-Jones em i man bilong Ingran husat i bin wok long Papua Niugini long 1982, pastaim long em i go statim

media bisnis long Vanuatu long 1989.

Em i wanpela man husat i save sanap strong long sapatim media fridom na tokaut egensim korapsen long ol nius ripot bilong em.

Na bikos long dispela, ol i bin paitim em, salim em i go long kalabus na ol i rausim em long Vanuatu planti taim.

Mista Neil-Jones i tok ol nius ripota long rijon i gat bikpela wok long pait egensim korapsen.

Em i tok ol ripota i mas soim rispek long kalsa tasol long wankain taim ol i mas tingim bikpela wok bilong ol long stopim pasin bilong korapsen insait long gavman.

Vanuatu i bihainim nupela lo bilong graun

VANUATU i stat nau long bihainim ol nupela lo bilong graun long kantri aninit long Len Rifom Ekt.

Ralph Regenvanu, Lens Minista bilong Vanuatu i tokim ABC long dispela.

Em i tok gavman bilong Vanuat i bin statim dispela wok bilong lukluk na glasim gut ol wok bilong lukautim na yusim graun long Vanuatu sevenpela yia i go pinis.

Dispela senis i bihainim ol bikpela wari long graun we sampela pipel i no save toktok wantaim ol lain wanpelin bilong ol bipo long ol i salim graun.

Long Vanuatu, wankain olsem ol narapela kantri long Melanesia olsem PNG na Solomon Ailan, graun em i olsem blut bilong ol pipel.

Tasol planti taim sampela famili memba i save harim gris toktok bilong ol narapela pipel na salim putim graun bilong ol long lis.

Dispela pasin i save kamapim planti kros namel long ol famili na ol wanpelin.

Turis bisnis i wok long kamap bikpela long Solomon Ailan

TURIS bisnis i wok long kamap bikpela nau long Makira Ulawa provins insait long wanpela yia tasol.

Siaman bilong Turis Makira Ailan, Noel Mamau i tok insait long wanpela yia tasol namba bilong ol nupela eko-turis bisnis long ailan i kamap bikpela.

Em i tok Makira i gat bikpela sans moa long developim turis bisnis.

Mista Mamau i tok Makira i gat ol samting bilong kalsa we i stap tasol long hap, na tu, ol i gat samting olsem 14 pisin na planti moa samting ol turis i ken go lukim.

Em i tok intres long turis bisnis long provins i wok long kamap bikpela bihain long naba wan Banana Festival em ol i bin holim long yia i go pinis.

Ol Raun Nabaut Poto



Pikinini bilong Praim Minista amamas long bungim papa bilong en long taim em i kamap long opim nupela PIH haus sik long 3-Mail las wik Fraide



Praim Minista wantaim meri na pikinini bilong en i sanap wantaim CEO bilong PIH Dokta Armyna Sultan na ol woklain bilong haus sik insait long wanpela rum bilong haus sik.



Sampela ol medikal woklain bilong PIH amamas tu long opim haus sik.



Café Pasifik em ples bilong ol siklain na ol woklain i baim kaikai. Em i luk nais moa. Papa bilong haus kai em Mista Amin i soim ol woklain bilong Café long putim gut ol kaikai bilong ol ges long openim PIH haus sik.

MVIL winim kot long Australia long K60 milien mak

MOTO Vikel insurens Linmited (MVIL) i winim kot long Australia long mani mak bilong A\$20m o moa long K60 milien kina. MIVL long dispela wik i kisim K41 milien bihainim Suprim Kot oda bilong Nu Saut Wels, Australia.

Long Desemba 17, 2014, Suprim Kot long Nu Saut Wels i givim oda long Woodlawn Capital Pty Ltd (Woodlawn) long givim AU\$ 20 milien i go long MVIL bihainim wanpela kot oda bilong Oktoba 2014.

Woodlawn i givim AU\$ 20 milien i go long Gadens Lawyer Tras Akaun long PNG na long dispela wik Gadens Lawyer i givim K41 milien i go long MVIL.

Gadens Lawyer i bin makim MVIL long harim kot na stretim ligel wok taim kot namel long MVIL na Woodlawn i stat long mas, 2011.

Dispela em kaikai bilong longpela kot namel long MVIL na Woodlawn husat i bin pait long AU\$26 milien i stap long benk akaun we Woodlawn i bin menesim na kot bin pasim akaun long Mas 20, 2012.

Independen Pablik Bisnis Kop-


resen (IPBC) aninit long bisnis lo, Pablik Bisnis Kopresen Ekt 2002 bilong kantri i bin makim MVIL na go pas long dispela kot long Julai 2011.

Dispela kot i kamap long Suprim Kot long Australia bihain long MVIL i givim K96 milien long 2009 i go long Woodlawn long mekim invesmen na menesim mani long mekim winmani. Tasol kot i kamap taim sampela samting i no go gut na MVIL i no bin wanbel na i laik kisim bek mani.

IPBC i tok em bin salensim dispela long kot long PNG tasol em bai no inap mekim moa toktok long dispela kot long dispela taim. Tasol iPBC i bin tok orait long salensim long kot long Australia.

IPBC i tok i gat sampela samting i stap yet long Suprim Kot long Australia bai go het na lukluk long stretim taim tupela kampani go bek long kot long Mas 30, 2015.

Suprim kot long Australia bai lukluk sapos MVIL bai kisim intres long mani em i bin givim long Woodlawn na tu sapos Woodlawn bai baim kost bilong ol loya bilong MVIL.



Gadens Lawyers i givim K41 milien i go long MVIL. Menesing Dairekta bilong IPBC Wasantha Kumarasiri na Siaman bilong MVIL, Dokta Ken Nangan na ol wokman bilong MVIL na Gadens Lawyers.

Nupela wok bilong painim gol na kopa long Westen provins

PRAIM MINISTA Peter O'Neill i bin bungim wanpela kampani bilong Amerika long lukluk long mekim eksplorasen wok long kopa main long Star Maunten long Westen provins.

Long dispela wik, Mista O'Neill i tok welkam long Anglo American Ltd long taim em i bungim ol eksekutiv bilong kampani na Highlands Pacific long Pot Mosbi.

Mista O'Neill i tok Highlands Pacific em i kampani bilong Anglo American PTL na i kamap join vensa long mekim eksplorasen wok long kopa na gol projek klostu long Star Maunten long Westen provins.

"Em i gutpela long kamap join vensa wantaim kampani i gat bikipela eksperiens na em i gut nius long ol sea holda bikos kampani i gat olgeta samting long wok long kopa na gol projek long planti yia i kam." Mista O'Neill i tok.

Menesing Dairekta bilong Highlands Pacific, John Goodwing i tok tenkyu long Praim Minista long miting na sainim agrimen we Highlands Pacific bai mekim bikipela wok long maining projek long Westen.

"Anglo American em wanpela kampani i gat nem na eksperiens long maining na eksplorasen na dispela agrimen long mekim wankain wok long Star Maunten bai karim gutpela kaikai."

"Yumi ken gohet wantaim klia eksplorasen

program na bai testim sais na gred bilong gol na kopa long nupela projek sait," Mista Goodwing i tok.

Dispela eksplorasen na developmen bilong join vensa em kampani i sainim pinis long Desemba 8, 2014 na long dispela wik, divelopa na gavman i tokaut long agrimen na wok program

Wok redi bilong eksplorasen na driling operesen bai kamap. Kampani bai driling graun i go daun long 3,000 mita. Na wok bai stat long mun Epril, 2015.

Highlands Pacific em kampani i rejista long PNG olsem maining na eksplorasen kampani. Kampani i gat ol aset long mani mak bilong US\$2.1 bilien. Em i mekim manining wok long Ramu Nickel cobalt main na Frieda Riva kopa na gol projek. Na nau bai em i mekim ol eksplorasen wok long Star Maunten.

Highlands Pacific i gat laisens long mekim eksplorasen wok long Muller Maunten long boda bilong Westen, Sauten Hailans na long Nomenbi Ailan long Milen Be provins.

Mista O'Neill i tok Star Maunten i gat bikipela gol na kopa stap, we i gat ripot olsem 50 yia go pinis, driling bin kamap tupela taim.

Highlands Pacific i mekim pinis 28 driling long 6-pela eria bilong painim gol na kopa long Star Maunten.

Sevei soim olsem ol baret na han wara long Kurumbukari em seif

WANPELA wok painimaut i bin kamap long sekim ol liklik han wara arere long bikipela Kurumbukari nikel/kobalt main we divelopa Ramu NiCo Menesmen (MCC) Limited i mekim wokim bilong en long Madang provins i soim olsem wara i stap gut na ol pipel i ken yusim yet.

Envairomen seksen bilong Ramu NiCo Helt, Sefti na Envairomen (HSE) Dipatmen i bin pinisim fainel kwata wok painimaut na sevei bilong en las wik. Em i karamapim tu fainel kwata bilong las yia.

Envairomen tim bilong HSE Dipatmen bilong Ramu NiCo i mekim namba wan hap bilong wok painimaut o sevei long Riverine na ol hap wara ol i kolim oksbou daunbilong Kurumbukari (KBK) Main na i kisim ol rekot long ol kontrol sait o masin ol i putim arere long bikipela Ramu riva.

Long las na fainel hap bilong wok, tim i wokabaut wantaim wanpela saveman bilong Aquatica Environmental bilong Australia.

Insait long dispela wok painimaut raun, ol i sekim ol liklik ol enimal long wara na tu ol kindam na ol arapela samting we i save stap long graun long wara. Dispela wok painimaut i karamapim olgeta liklik wara baret na ol han wara we i kamaut olsem long KBK main eria em wok bilong Ramu

NiCo Projek i stap long en.

Ol sevei tim bilong Ramu NiCo HSE em ol envairomen opisa long KBK Main, Alex Kambual, Nathaniel Wadakai na Dickson Yoga wantaim helpim tu bilong Philip Atio bilong Ramu NiCo HSE Kopret opis long Madang.

Insait long dispela wok painimaut ol lukim olsem kwaliti bilong wara we i stap insait long eria we wara i kam daun long KBK Main em seif taim ol yusim wanpela kain spesel masin bilong stadi na skelimbilong wara ol i kolim Horiba U50 maltiprob. Dispela masin i glasim wara, graun insait long wara na ol enimal long wara na wanem helt bilong ol long ol riva, baret wara na ol han wara long KBK eria.

Ramu NiCo i save mekim ol wok painimaut long envairomen em i wok long en long KBK main na Basamuk Rifaineri long olgeta kwata insait long wan wan yia.

Olgeta yia tu kampani i save wok klostu wantaim ol pemit o wanem samting gavman aninit long Dipatmen ov Envairomen na Konsevesen (DEC) i laik ol i mas mekim.

Antap long dispela tu, em gavman i save laikim ol autsait independen konsalten long mekim painimaut bilong em yet long skelimbilong wok i kamap long wok painimaut.



POTO: Praim Minista Peter O'Neill i miting wantaim ol eksekutiv bilong Highlands Pacific na Anglo American.



Ol envairomen opisa bilong Ramu NiCo (MCC) i wok klostu wantaim wanpela independen konsalten long sekim ol han wara long Kurumbukari eria long Usino-Bundi long Madang.

Singaut long gavman stretim kopi industri

Stanley Nondol i raitim

KOPI em bikpela kes krop long Hailans rijon na sampela provins bilong nambis tasol ol kopi fama i no kisim sapot long gavman na planti ol kopi plantasin na liklik blok i dai na planti faktori i no moa wok.

Memba bilong Dei, Wesley Nukunts i tok bikpela populesen bilong Hailans rijon i kisim bikpela sapot long kopi long sapotim ol yet tasol kopi i no gat sapot bilong gavman.

Mista Nukunts i askim Minista bilong Egrikalsa, Tommy Tomscoll long tok klia long pablik ol plen bilong gavman long kirapim kopi industri. Em i tok sapos gavman i no gat plen bai olsem wanem long ol liklik fama long ples.

Mista Nukunts i tok planti ol bikpela kopi plantasin long Hailans i lukim bus i gro na ol faktori tu i no moa wok olsem bipo.

Em i tok Minista bilong Egrikalsa na Dipatmen bilong Egrikalsa i stat long givim kopi eksporting laisen long wan wan distrik na long salim

kopi long wol maket. Tasol ol fama bai kisim kopi olsem wanem na bungim mak bilong eksport aninit long laisens.

Minista Tomscoll i tok kopi long kantri i bin kam daun long las 30 yia bikos planti ol plantasin na liklik kopi blok em bilong bipo na ol diwai go olpela pinis na i no karim planti pikinini moa.

Mista Tomscoll i tok i tru olsem gavman i no bin sapotim gut kopi industri long planti yia na sampela hevi i kamap long ol bikpela kampani i gat eksport laisen na

lukim kopi i pundaun.

O'Neill gavman i wok long givim kopi eksport laisen long sampela distrik na i tok olgeta distrik bai kisim laisen bilong eksport.

Minista Tomscoll i tok pastaim ol ausait kampani, ol i no papa bilong kopi tasol ol save kamap olsem namel man na kisim eksport laisen na salim kopi go aut na mekim bikpela winmani. Na ol kopi groa i kisim liklik mani.

Aniit long lo bilong nupela eksport laisen, husait kampani i laik kisim laisen i mas gat kopi

gaden long mak bilong 10,000 hekta o moa.

Mista Tomscoll i tok em i moa gutpela long ol pipel i mas planti nupela kopi na pikim planti prut na salim bikpela long maket.

Mista Tomscoll i tok moa olsem gavman i stat long stretim dispela hevi na givim laisen em wanpela bilong rot long givim strong long ol kopi groa yet bai salim kopi. Em rausim namel man, ol ausait kampani. Em i tok aninit long nupela laisen, wanpela laisen holda i ken salim 3,000 kopi bek.

OI OTML woka bai kisim wol klas trening

OL SUPAVAISA na ol woklain bilong Ok Tedi Mining Limited (OTML) bai kisim wol klas trening na developmen long 5-pela yia aninit long wanpela multi-milien kina stretejik patnasip program.

OTML em maining kampani bilong gavman na i sainim Memorandum ov Andastanding (MoU) wantaim wanpela kampani bilong Australia, JKTech long las mun long givim trening long ol woklain wantaim nupela teknoloji na sevis.

JKTech em wanpela kampani i gat nem na eksperiens long givim trening na sevis we i gat ikonmik na sosel veliu long ol risos industri long wol. Na em i wanpela tenkoloji trensef kampani bilong Sastenabel Minerels Institut long Yunivesiti bilong Kwinnslen, Australia.

Aninit long MoU, JKTech bai helpim long developim Humen Risos Kapital Developmen program bilong OTML. Trening bai stat wantaim ol wokman na meri husat i holim lidasip posisen olsem ol supavaisa.

Sif Opereting Opisa (SOO) bilong OTML, Musej Werror i tok patnasip em impoten na bai helpim long apim save bilong ol wokman na meri na bai

kamapim gutpela faundesen bilong kampani long bihain taim.

Mista Werror i tok OTML bai bungim bikpela salens long ol yia i kam bikos prais bilong gol na kopa i pundaun long wol maket. Na i gat sampela hevi bilong prodaksen kampani i wok long bungim long dispela taim.

Mista Werror i tok ol woka i mas kisim gutpela trening long apim save na dispela bai helpim kampani long gro. Em i tok dispela program bai helpim OTML long bihain taim, na tu, bai helpim ol woka long bihain taim bilong ol.

Jenerel Menesa bilong JKTech, Brett Cunningham i tok ol woklain bilong OTML bai kisim gutpela trening na sevis bilong wol klas na dispela bai helpim kampani long kamap gut long lukim gutpela kaikai na husat i kisim trening i ken yusim long ol arapela maining kampani long tai mol I lusim OTML.

Aninit long dispela MoU, JKTech bai helpim OTML long gutpela wok bilong Humen Risos na bai givim trening bilong nupela Teknoloji long data koneksen na prosesing na mekim plen bilong divelpoim wok bilong OTML.



Poto: Humen Risos (HR) Menesa bilong OTML, Harold Duigu i givim MoU i go long JKTech, Jenerel Menesa Brett Cunnning na Sif Opereting Opisa bilong OTML, Musej Werror i lukluk stap.

Minista save long Barrick laik salim Porgera Gol main long Esia



Minista bilong Maining, Byron Chan

Stanley Nondol i raitim

MINISTA bilong maining, Byron Chan i tok em i save long ol toktok i raun olsem wanpela kampani long Esia i laik baim Porgera gol main long Enga provins.

Mista Chan i tok em i samting bilong kampani yet na gavman i save tasol i wet long ol toktok long baim Porgera i pinis.

Mista Chan i mekim dispela toktok long palamen taim memba bilong Laigap/Porgera, Nixon Mangape i askim em long tok klia sapos Dipatmen na Ministri bilong Maining i save long wanpela kampani bilong Esia i laik baim Porgera gol main.

Mista Mangape em Sedo Minista bilong Maining na em stap wantaim Oposisen. Em i memba bilong Porgera we Barrick Limited i gat bikpela gol, Porgera gol main.

Mista Mangape i askim Mista Chan long tok klia sapos gavman i save olsem ol toktok i kamap namel long Barrick, papagraun na provinsal gavman long salim 95 pesen bilong main go long dispela kampani bilong Esia.

Mista Mangape i askim Minista Chan tu long tok klia husait bai stretim ol pipel long Porgera i kisim bagarap long envairomen long las 25 yia sapos nupela kampani i tekova.

Em i askim tu olsem wanem bai kampani muvim ol papagraun i go long nupela hap long ol ken wokim haus na stap bikos developmen i kamap long maining na ol papagraun i no gat graun long stap.

Mista Chan i tok gavman i no inap kam insait long dispela toktok bilong salim, em i tok dispela i samting bilong ol kampani yet.

Mista Chan i tok em i wok bilong kampani husat i gat laisen long mekim wok maining long Porgera bai stretim ol bagarap long envairomen bilong bipo, nau na bihain taim.

Minista Chan i tokim palamen olsem ol toktok i kamap yet long painim sampela hap graun long putim ol papagraun na dispela hevi bai pinis taim mipela i painim graun.

IPBC na Angliken sios sainim MoU long haus bisnis

INDEPENDEN Pablik Bisnis Kopresen (IPBC) na Angliken sios i sainim Memorandum ov Andastanding (MoU) long kamap join vensa na developim ril estet bisnis long Pot Mosbi siti.

Menesing Darekta bilong IPBC, Wasantha Kumarasiri, Sif Igel Opis bilong IPBC, Erastus Kamburi, Asbisop Clyde Igara na John Francis Kaupa bilong provinsal bod ov trasti i sainim agrimen long dispela wik long Pot Mosbi.

Wanpela bilding ol bai mekim em long taun long

Mosbi na em i bai wankain olsem twin tawa long Malaysia.

Nem bilong dispela agrimen em "Twin Tower Joint Venture Projeck". Dispela hap graun bikpela haus bai kamap long en i em stap nating nau.

Dispela developmen em hap plen bilong IPBC na wanpela bilong dispela ol plen bai rausim Mosbi sip bris na putim long Motukea.

Minista bilong Pablik Entaprais Ben Michael i kamap long taim bilong sainim MoU.



Menesing Dairekta bilong IPBC, Wasantha Kumarasiri, Sif Igel Opis bilong IPBC, Erastus Kamburi, Asbisop Clyde Igara na John Francis Kaupa bilong provinsal bod ov trasti i sainim agrimen long dispela wik long Pot Mosbi.



Glasing ol Sasteinabel Agrikalsa Projek long KBK na Inlen Paiplen Eria

SASTEINABOL agrikalsa Dvelopmen seksin bilong Ramu Komyuniti Afes Dipatmen i win mekim wanpela wok raun insait long tripela de long painimaut ol hevi na ol arapela samting i pas wantaim agrikalsa faming na kakao dvelopmen .

Dispela fil wokabaut bilong ol CA agrikalsa opisa i bin kamaplong Januari 27 to 30, na man i go pas long tim strongpela man bilong wok agrikalsa risets na dvelopmen Allan Wahwah.

As-tingting bilong dispela lukluk raun em long painimaut wanem ol wok i ken kamap long sait long groim ol gaden kaikai na kumu sayor na kakao insait long komyuniti o ples na hauslain we i stap arere long Ramu NiCo Kurumbukari (KBK) Main.

Dispela wok-raun i laik painimaut tu long wanem ol samting o presa i stap wantaim ol pipel we i ken strongim o mekim ol ino laik long go insait long wok bilong groim gaden kaikai na kumu-sayor long kisim mani long sapotim sindaun bilong ol long ples. Antap long dispela tu em long painimaut wanem strong ol stap long helpim ol pipel, ol hevi i stap na wanem pret i stap.

Namba tri samting we ol CA agrikalsa tim i lukluk long en em long luksave long ol hevi we i stap traun long painimaut wanem ol gutpela rot long daunim ol dispela hevi.

Bikpela samting tru insait long dispela wok-raun em long lukim ol as tru bilong ol hevi i stap na wane mol gutpela samting i stap na kamap wantaim dvelopmen plen. Dispela plen bai em CA Agrikalsa Seksin bai dvelopim na ol pipel i ken kisim na yusim long muvim wok bilong ol long sait long agrikalsa wok long gaden na kakao projek bilong ol.

Moa long en tu dispela ol wok plen em CA Dipatmen bai i wokim kamap em mas trupela wok-plen we i ken karim kaikai long sapotim tru prodaksen we ol pipel i mas wok wantaim long sapotim sindaun bilong ol long bihain-taim na rot long kisim mani long helpim sindaun bilong ol wantaim pikinini na famili bilong ol.

Ol viles komyuniti we ol CA agrikalsa opisa bilong Ramu NiCo i bin go lukim na kisim tingting bilong ol pipel em long Danagari, Banu, Ainangri, Dengekeve long



Ol family kisim sids long groim ol kumu long KBK eria.



Ramu NiCo wantaim CCI i givim polibeg long planim kakao long Danagari.


KBK eria na Usino bik-ples na Igu-ruweh long Inlen Paiplen eria.

Ol projek we CA Agrikalsa Seksen bai i lukluk long en long sait long agrikalsa faming long sait groim gaden kaikai na kumu-sayor i karamapim sampela eria olsem ples i gat gutpela graun na ol manmeri i save wok hat o nogat.

Dispela wok-raun i painimaut olsem i gat intares i stap long ol ples olsem Danagari long sait long groim gaden kaikai na salim, na i gat tu ol grup i kamap pinis long strongim dispela tingting long wok. Long Danagari viles i gat Danagari Femili Wimens Grup na long KBK i gat Enekuai Famas grup i stap.

Bikpela samting we dispela wok-raun luksave em intares bilong ol pipel i stap tasol ol i nidim sampela kain sapot long pusim ol long muv i go fowat long kamapim wok.

Wok-raun i luksave tu olsem long sait long kakao prodaksen, dispela pablik-praivet patnasip (PPP) we CA Agrikalsa seksen i gat wantaim Kakao Kokonas Institiut (CCIL) i mas go het bikos em wanpela gutpela rot long serim risoses na tu tingting long kamapim moa gutpela wok.



Agrikalsa tim mekim aweanes long Danagari.

Mama ya nau i groim kumu sayor wantaim sids em i kisim long Ramu NiCo.



salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komyuniti'

RAMU NiCO **Ramu NiCo redi long givim**
 Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.
 Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamak rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta



PM bai slekim buai tambu



Sape Metta i raitim

PASIN bilong tambuim buai long biksiti Pot Mosbi i wok long kamapim planti birua na hevi tu long ol lain i hait na salim na baim ol buai insait long siti.

Na rot blok em Nesenel Kapitel Distrik Komisn (NCDC) wantaim helpim bilong polis long Braun Riva na Laloki eria i stopim planti bek buai we i wok long kam olsem long Kerema long Galp provins, Kairuku na ol arapela eria long Sentrel Provins i stap long Kairuku/Hiri na klostu long bikpela Hiritano Haiwe.

Nau yet taim rot blok i stap, ol asples man na meri husat wokim buai bisnis nau i wok long yusim ol dinghi long kisim ol buai bek na ran long solwara long abrusim rot blok na kisim ol buai i go long siti.

Dispela pasin i wok long kamap strong tru.

Tasol i no long taim nau dispela pasin bai stop, long wanem, Prais Minista Peter O'Neill bai slekim liklik

dispela lo bilong buai tambu.

Mista O'Neill long taim bilong openim Koki maket tupela wik i go pinis i tok, em bai slekim lo bilong buai tambu, long wanem em i rispektim ol lain bilong salim, baim na kaikai buai.

Em i tok gavman bilong em bai putim K2.5milien i go long surukim Koki maket na kamapim spesol spes insait yet long maket bilong ol man na meri i ken go het long wokim buai bisnis.

Mista O'Neill i tok wankain pasin tu bai kamap long Godens maket, Lareva maket long Hohola, Tokarara, Gerehu na Sabama maket.

Em i tok sori olsem planti hevi na 12-pela dai tu i kamap pinis bihain long buai tambu i bin kamap long yia i kam inap nau.

Na em i kamap wantaim tingting long slekim nau tambu bilong buai bisnis na larim ol man na meri i ken go het long wokim buai bisnis bilong ol insait yet long ol spesol ples long ol bikpela maket long siti.



DINGI TRESPOTIM BUA: Rot long Braun Riva na Laloki we ol buai bek bai i no inap go long ol maket long Pot Mosbi siti, tasol long solwara, rot em i no pas. Olsem na ol lain husat i save wokim buai bisnis i wok long yusim ol dingi long karim ol buai i go insait long siti. **Poto: Sape Metta**

Rais developmen bai go het long Vanapa-Brown Riva eria

KAIRUKU-Hiri Distrik long Sentrel Provins long dispela yia bai lukim moa rais prodaksen bihain long Trukai kampani i testim graun long lukim sapos rais inap long go long dispela hap.

Bihain long ol i wokim ol tes long distrik, Trukai long dispela yia i gat plen long planim moa rais long Vanapa-Brown Riva eria we pipel i ken groim rais na salim.

Long dispela yia, plen i stap long traim planim komesel rais o rais bilong salim long 10-pela hap graun hekta.

Ol bai makim sampela model groa long kisim namel long wanpela na tupela hekta blok na kamapim dispela komesel rais projek.

Trukai i gat plen long mekim tes bilong groim komesel rais prodaksen long 400 hekta hap graun.

Kampani i baim ol trakta na arapela samting long helpim long kamapim dispela projek, na lukim olsem em i ran gut.

Kampani i wok long glasim na skelim tu ol arapela samting moa we i gat long em tu infrastraksa long lukim olsem dispela rais projek i ran gut.

"Tru, dispela i gutpela, tasol kost bilong dispela developmen, kisim ol risos na woklain long makim pedi fil bilong statim rais projek na lukim olsem wara i stap olgeta taim long pedi fil em ol sampela bikpela kos kampani i mas tingim long dispela bikpela projek, "Sif Eksekutiv bilong Trukai Industries, Greg Worthington i tok.

Em i tok long projek i ran gut, kampani i lukluk long ol fama na laik bilong ol long go insait na mekim wok i karim kaikai.

Em i tok Trukai i redi long givim teknikel edvais, we em i wok long mekim, na maket long PNG tude.

Em i tok long sait bilong maketim rais, Trukai i wok long ofaim mak long prais bilong rais we ol i yusim long wol maket.

"Kampani i wok wantaim ol asples lain long kamapim gutpela developmen model long gutpela rais bisnis bilong ol pipel yet," Mista Worthington i tok.

Long ol tes ol i wokim pinis, menesmen bilong ol binatang na ol "weed" o gras nogut i save gro namel long ol rais na kamapim bagarap em ol eria we ol i bin karamapim. Na dispela bai helpim long kamapim gutpela rais i karim gutpela kaikai.

Ol ples we ol i wokim ol tes rais projek em long Amadi na Vekabu viles.



Poto i soim Joseph Haino i draivim trakta i digim graun long planim rais long Amadi rais projek eria taim ol narapela ples mangi i lukluk i stap. **Poto: Trukai Rais**

Ol komyuniti sola fam i gutpela long PNG



Aroma Komyuniti 15KW sola fam i yusim sola long kisim pawa bilong san na yusim long lait na pawa. **Poto: OCCD**

OL rurel komyuniti insait long Pomio, Is Nu Briten Provins nau i ken yusim sola pawa long kisim pawa long helpim kamapim gut laip na sindaun bilong ol.

Ol toktok i kam long Opis bilong Klaimet Senis na Developmen (OCCD) i tok tenkyu long PNG Pawa Limitet (PPL) long helpim na putim ol sola penel long ol haus insait long ol rurel komyuniti long Pomio na nau ol i kisim ol gutpela, klinpela pawa i no inap pinis, na i sevim mani tu.

Opis bilong OCCD i tok dispela i go strongim wok bilong Klaimet Senis Kompatibel Developmen na Menesmen Polisi (CCDMP) we Nesenel Eksekutiv Kaunsil i bin kamapim long las yia.

PNG i gat planti rot long kisim klinpela fri pawa we i no inap pinis, tasol i mas gat mani long luksave, kisim na yusim ol dispela eneji o pawa.

pawa jenereta we kos i ken go antap 3 o 6-pela taim moa.

Tasol kos long yusim dispela sola pawa long longpela taim i liklik, na ol pipel bai kisim planti gutpela samting long en.

Long planti narapela kantri long wol, ol sola pawa plent i save givim pawa long sais bilong populesen we i bikpela 10-pela taim moa long populesen bilong Mosbi.

OCCP i sapatim ol rurel komyuniti long PNG long yusim sola fam na em i gat pilot projek long Aroma, Sentral Provins.

Ol i pinisim ol fisibiliti stadi long ol rurel komyuniti long Isten na Sauten Hailans, Enga na Sentral Provins.

Komyuniti sola fam em i nupela rot na stat bilong samting we Yunaitet Nesens Fremwok Konvensen long Klaimet Senis (UNFCC) i bin oraitim.

Na ol i makim ol wan wan eria long bildim ol sola penel long kisim pawa.

OCCP i askim ol lain husat i laikim dispela klinpela eneji projek long rejistaim ol projek bilong ol wantaim OCCD.

Projek bai kam aninit long Klin Developmen Mekanisim (CDM) program na kantri i ken benefit o kisim gutpela samting long Kabon Kredit ol i salim long kabon maket.

OCCD i tok bikpela samting em i mas gat beislain stadi we bai soim rot we projek i daunim kabon long ea na ol lain long PNG i ken go insait long kabon projek.

As tingting long polisi bilong kantri (PNG) long Klaimet Kompetibel Developmen Menesmen i bilong apim mak bilong eneji CDM projek na kantri i ken benefit long Kabon Kredit.

Skelim wantaim India, PNG i gat 11-pela CDM projek taim India i gat 3000 na em i wok long benefit long ol Eneji Kabon Kredit.

I kam inap nau, PNG Pawa i gat Divune Hydropower projek long Oro Provins olsem klinpela developmen Mekanisim projek long kisim ol Kabon Kredit long en.

Gavman luksave long gol wina Va'a tim bilong man i winim gol

PAPUA Niugini gavman bai luksave long ol etlit husat i winim gol medol long Pasifik Gems bai kamap long Pot Mosbi long mun Julai long dispela yia.

Dispela em Minista bilong Spots, Pasifik Gems na Nesenel Iven, Justin Tkatchenko i tokaut olsem olgeta spot i winim gol medol bai kisim K20, 000. Em i tok gavman i givim K5.7 milien long dispela.

Minista Tkatchenko i tok ol i luksave long sakrifais na hatwok bilong ol etlit.

Em i tok ol etlit long tim na wan wan spot bai kisim K20, 000 long olgeta gol medol ol i winim.

Long dispela insentiv samting long givim ol pilaia i wokim gut, wanpela pilaia long tim olsem ragbi seven bai kisim K20, 000 sapos tim bilong ol i winim gol medol na wan wan man long spot olsem boksing, bai kisim sem mani mak long olgeta gol ol i winim.

Long wankain taim, Tim PNG Chef bilong Misin, Richard Kassman, i tok tenkyu long minista na gavman long sapot bilong ol.

Em i tok moa olsem planti ol etlit i sakrifais na kain ol insentiv i save mekim ol pilai strong.

Mista Kassman i tok ol pilaia i lusim skul na wok bilong ol pastaim long makim kantri na pilai, na kain insetiv em i bikpela samting.

Olsem 5-pela mun nau bipo long opening seremoni long Julai 4, olgeta PNG etlit i trening strong na dispela nius bai kirapim tingting bilong ol long taim bilong Gem.

Presiden bilong PNG Olimpik Komiti, Sir John Dawanincura i amamas long gavman long sapot bilong em.

Em i tok dispela Gem bai kamap long graun bilong ol na ol, etlit bai pilai strong long win.

Em i tok gavman i sapotim gem long wanem spot em i save karim nesanel yuniti na praid.

Sir John i tok O'Neill gavman na Minista bilong Spots i luksave long pawa spot i save gat long developmen bilong kantri.

Em i tok dispela bai helpim ol jeneresen bai kam bihain.

Long dispela, em i tok ol etlit i mas tingting long winim gol medol, riwod bai kam bihain.

Wankain long dispela gavman i bin luksave long Steven Kari na Dika Toua long winim gol medol long Komonwelt Gems wantaim K100, 000 long wan wan pilaia long 2014.

PAPUA Niugini man tim bilong Va'a i winim gol long Australia Nesanel taitel we i kamp long Janueri 30 i go long Februari 1 long Sunshine Coast long Kwinslan.

Australia Autriga Kenu Resing Asosiesen (AOCRA) olsem Wol Sprin Kualifaya i hosim dispela pilai bilong ol tim na PNG tu i bin go pilai. Ol i hosim sprin tasol na ol PNG man i pilai gut na winim gol long V12, na kisim brons long 1500 mita na 500 mita pilai.

"Ol mangi i mekim gut stret long winim gol. Dispela i soim olsem ol i stap long stretpela rot long redi long Pasifik Gems," tim kosa, Michael Bai i tok.

Bai i tok em i namba wan rot i go het olsem 160 de, tasol ol bai traim na wok hat. Em i tingting long go insait long ol sampela moa kompitisen bipo long Pasifik Gems.

Tim Menesa, Helena Dickson, i tok kompetisen i hat tasol tim i redi long salens

na pinis gut.

Em i tok moa olsem bikos em i Wol Sprin, level bilong kompetisen i hai kwaliti stret.

Wantaim 5-pela etlit anit long 19 krismas na bikpela em 36, kosa Bai i amamas long hat wok bilong yangpela tim bilong ol i egensim ol olpela tim.

Kosa Bai i tok moa olsem ol i yangpela tim, tasol ol i strong na pilai strong na win. Em i tok i gat planti wok yet tasol em i amamas long win bilong ol.

Long wankain taim, tim bilong ol meri i pinis gut wantaim ol silva medol long 1500 mita na 500 mita sprin, na wanpela brons long V12 bilong 250 mita sprin.

Bai i bilip olsem win bilong tim i soim gutpela trening ol i kisim long PNG Olimpik Komiti Hai Pefomens Senta na hatwok bilong ol pilaia na ol opisel.

Em i tok tenkyu long gavman long G4G mani long PNG Olimpik Komiti we i mekim isi long ol go pilai long ol intanesenel iven.

Mipela redi nau

MINISTA bilong Spots, Justin Tkatchenko i bilip strong olsem bikpela gem bai kamap long Mosbi na ol wok konstaksen long bildim pilai graun bai pinis long taim pastaim long opim Pasifik Gems long Julai 4 long dispela yia.

Minista Tkatchenko i amamas stret long lukim ol wok we ol konstaksen kampani i mekim taim em i go raun na lukim ol eria ol bai pilai long em.

Em i tok olsem gem i kam klostu na i no gat as long givim ekskius long pulmapim spes taim em i wokabaut raun long ol nupela pilai graun long Sir John Guise Stadium we opisel opening bai kamap long em.

Em i tokim ol pilai man na meri insait long Papua Niguini long strong long trening bilong ol na no ken ting ting planti long ol fesiliti na ol pilai graun.

"Wok bilong yupela ol spot man na meri em bilong trening na redim yupela yet long pilai gut long salensim ol narapela kantri.

Wok bilong yumi bai yumi lukluk long we bilong pinisim ol projek." Minista Tkatchenko i tok.

"Mipela i mas redi bikos mipela bai lukautim dispela gem we ol narapela kantri bai redi gut na kam long salensim mipela." Minista i tok.

Plantil ol eria bilong pilai olsem Sir John Guise Stadium, Sir Hubert Muray Stadium, Aquatik senta na Etlis Vilis i klostu pinis bipo long taim bilong opening.



Poto: Minista Tkatchenko i lukluk raun long Sir John Guise Stadium



Poto: **MERI WINA TIM:** Va'a tim bilong ol meri long Jackson's ples balus taim ol i kam bek. Ol i bin winim silva na brons medol. **Poto: Andrew Molen**

DIGICEL PNG Anda 19 Garamuts i go long ICC Wol Kap Kualifai Tonamen



Poto: Digicel PNG Anda 19 Garamuts kisim poto long Jacksons Intenesenel Ples balus long Tunde pastaim long ol i kalap long balus.

DIGICEL PNG Anda 19 Garamuts Kriket tim i lusim Pot Mosbi long Tunde 17 Februari long i go stap insait long Intenesenel Kriket Kaunsel (ICC) Is Esia Pasifik (EAP) Anda 19 Tropi long Blenheim, Nu Silan long 24 Februari i go long 1 Mas 2015.

Digicel PNG, Sponsorship Manager Jayleen Morris i bin stap long Jackson Intenesenel Ples balus long tok gutbai na em i tokim ol tim memba olsem, "Mipela long Digicel i amamas tru long lukim ol naispela na strongpela yangpela man olsem inap long go

na stap insait long U19 U19 ICC EAP Wol Kap Kualifai wantaim sponsa bilong mipela.

Kepten bilong Tim, Lou Toua husat bai makim PNG long namba wan taim, i tok em i gat bikpela bilip long tim bilong em na nau em i taim tru long ol i soim dispela stail bilong ol we ol i bin redi long em longpela taim pinis.

"Mipela i gat olgeta samting olsem wanpela tim na mipela i redi na tingting strong nau long go insait long tonamen na mipela i bilip bai mipela i kam bek wantaim gutpela risal long nem bilong kantri," Toua i tok.

Kosa bilong 8-pela yia, John Ovia, i tok em

i amamas long tim na em i ting bai ol i mekim gut long kwalifai long go insait long Wol Kap long namba 8 taim.

"Mipela gat strongpela rekot long EAP Rijen bikos mipela i stap long namba 1 sait. Em i gutpela olsem em bai givim mipela strong long winim tonamen long Nu Silan," Ovia i tok.

Taim bilong ol resis bilong ICC EAP Anda 19 Kriket Tropi-Blenheim, Nu Silan olsem:

Long Tunde 24 Februari, PNG bai pilai resis wantaim Fiji na Samoa bai pilai resis wantaim Vanuatu. Long Trinde 25 Februari, PNG bai pilai resis wantaim Samoa na Vanuatu bai pilai wantaim Fiji. Na long Fraide 27, PNG bai pilai wantaim Vanuatu na Fiji bai pilai wantaim Samoa. Long Sarere 28 Februari bai ol i pilai frenli gem namel long ol yet.



Mitchell Pearce, Jake Friend kisim wok olsem ko-kepten bilong Sydney Roster long 2015 NRL sisen

Kosa Trent Robinson bai gat tingting olsem dispela apoinmen bai kamapim gutpela stail na strong bilong tupela long wanem long taim bilong of-sisen tupela i bin stap long sampela hevi taim ol i bin stap insait long klap. New Saut Wales Stet ov Origin sait las yia i bin lusim Pearce bihain long em i bin kamapim trabel wanpela nait insait long Kings Cross.



Pastaim strongpela Saut Sydney Rabbitohs kepten John Sutton i abrusim hevi bilong Arizona nau

Michael Maguire i tok John Sutton i kisim save nau long hevi bilong Arizona, na em bai redi long putim lek i go daun long raun wan bilong NRL. Bihain long wanpela hatpela wik, Sutton i mekim moa eksen long setim wanpela trai na em i go long sin-bin long 20-20 dro bilong Queensland Kap sait, Noten Praid long Sarere nait.



Paul Gallen i abrusim NRL sas long All-Sta hai takol

Man i stap long tok pait nau, Cronulla Sharks kepten Paul Gallen bai stap sambai long namba wan raun bilong NRL bihain long em i abrusim ol sas bilong NRL mets rivi komiti long Sarere bihain long All-Sta gem. Ol i bin putim NRL All Sta fowot Gallen long ripot bilong hai takol em i mekim long Indigenous All Sta bekro Kyle Turner insait long namba 4 minit tasol bilong gem bilong Fraide nait.



Indigenous All Sta i winim NRL All Sta 20-6 insait long pri-sisen eksibisen resis

I no longpela taim na Paul Gallen i painim trabel gen tasol ol Indigenous All Sta i win yet wantaim wanpela 20-6 winim ol birua bilong ol NRL all sta. Ol lain i lukim gem i bin toktok planti long taim ol i singaut long ol NRL All Sta fowot Gallen i kisim ripot insai long namba 4 minit taim em i bengim han bilong em long het bilong Kyle Turner na mekim em i ai raun.



KB Eels tim bilong Gordons tas ragbi

Oi wiken spot long poto

Oi poto: Nicky Bernard



Pilaia bilong Eagles i pilaim bal long Gordons tas resis.

Yangpela Yogomin bilong Lapwing Tigers i ron wantaim bal long tas resis bilong ol long Gordons long Mosbi.



Gordons tas resis i go insait long fainel nau na olgeta tim i pilai strong long stap insait long top 8 olsem dispela tupela Eels na Panthers pilaia.



Ai Sore: Kika bilong Eels Remiges i train pawa bilong lek bilong bilong em taim ol liklik sapota bilong put ai long lek bilong em.



Straika bilong Oro FC i laik hetim bal taim tupela pilai bilong Pom FC kam pasim em long Telikom NSL resis long Mosbi. Oro i winim dispela pilai 3-1.



Reggie Davani bilong Pom FC i train pawa long lek bilong em tasol Oro i wok long pasim em long olgeta hap.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by



RD Tuna Canners Ltd.

Moa mit na
oil insait



DIANA Blu

TUNA IN OIL

Hekari daunim Oro

Nicky Bernard i raitim

HEKARI nau go pas long poin lata bilong Telikom Supa lig Soka bihain long ol winim Oro FC 1-0 long was aut gem bilong ol long Bomana long aste, Trinde.

Tupela tim wantaim bin no skoa long namba wan hap bilong pilai. Dispela 45 minit bin lukim Oro bin gat sampela gut sans long skoa tasol lek bilong ol i no holim bal gut.

Hekari i bin gat bikpela sans long go pas skoa tasol ol kik bilong ol bin go stret long han bilong gol kipa bilong Oro.

Long namba tu hap, Hekari bin kam strong wantaim lapun straika bilong ol Kima Jack long fran na lidim ol yangpela straika bilong ol.

Hekari bin kisim wanpela kona long 20 minit long

namba tu hap bilong pilai we i paulim liklik kipa bilong Oro na go insait long gol mak bilong ol.

Dispela mekim skin bilong ol Hekari kirap na ol stat long pilai long eria bilong Oro we bek lain bilong Oro i mekim mistek na Hekari kisim penelti kik. Dispela penelti kik go i kipa bilong Oro bin sevim.

Oro gat tupela bikpela sans long skoa long namba tu tasol het na lek bilong ol i no painim gol mak bilong Hekari.

Long wiken go pinis Oro FC bin daunim stret Pom FC 3-1 na Hekari bin dro wantaim Admiralty 0-0.

Dispela wiken bai lukim Hekari bai kisim Pom FC na Oro bai kisim ol boi bilong Flai fox bilong Madang long Bomana CS graun long Mosbi na tupela tim bilong Lae Besta na Lae Siti bai pilai yet long Lae.



➔ Treated Mosquito Nets **PREVENT** Malaria

➔ Visitect **TESTS** for Malaria

➔ Arterakine
Tablets **TREAT**
Malaria

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.
Tel +675 325 3185 Fax +675 325 0190 Email sales@johnstons.com.pg